

公安縣志

藝文卷七
上

公安縣志卷之七

藝文志上

甚矣辭之不可以已也杜陵詩曰文章千古事得失寸心知黼黻隆平務揆華而行遠知可傳者在人善鳴者不朽至與善傳懿有裨於世道人心以及抽思弔古嘔心咏物是皆不可磨滅者山以仙靈川以珠媚能無識乎

贈大司徒黃山鄒公致政南歸序

明學士李時

公安縣志

卷之七

藝文序

一

嘉靖戊子冬大司徒黃山鄒公引年請老上曰邦計重寄是毗是倚卿其勿辭公遂閉門稱疾上遣醫命巾貴賚賜酒米肉菜以示眷畱公既具謝其請益堅疏三上上乃俞允錫之璽書令有司歲給輿皂月廩於是中外識與不識咸曰榮哉鄒公之歸也將行朝紳九卿而下相與醵餞之司徒儉菴梁公杏岡李公屬詞於予予惟士大夫出處之際亦大矣其始進也有簪組之華廩祿之給封錫之褒榮孰甚焉及其去也或罹於邦刑或戾於公議或忤於君上歉於其行

者十常八九惟夫賢者能審於去就見幾明決不蹈三者之患故進進也退亦進也其榮無異軌焉公舉癸丑進士予進也晚未始識公公爲諫議予友蓮北魯公嘗曰吾鄉有鄒黃山者恭而廉讓而不競賢者也予竊識之公爲少司徒予表兄桂巖邊公亦曰吾寅有鄒黃山者確而和通而不詭賢者也予又識之去年夏予以戶部起復至得侍公見其恭而廉也確而和也讓而不競通而不詭也魯邊二公之言符焉是以今日之舉明哲之義特達之識無愧於古人君

公安縣志

卷之七

藝文 序

一一

寵優渥公論交與旣高其節又惜其去豈不眞榮矣哉且康強怡愉氣和而充茲歸也黃山之麓爲三楚之秀昔人所謂虎渡龍洲又公所釣遊之地登高舒嘯臨流賦詩徜徉山水其樂詎有窮乎雖然君子居廊廟則憂其民處江湖則憂其君聖天子勵精圖治篤意斯民公之所親見也卽今汝穎樊鄧關陝梁益道殫相望公征車所歷得於目擊之餘其能已於中耶長章短疏必有嘉謨以慰九重南顧之憂此又諸薦紳之所望於公者公以爲何如

送陳道人宅白雲山序

洪 鐘

平河之口白雲之山野壙壘荆棘縱橫狐穴蟻國
問者不就樵夫牧子日上下呼唱而雨夜風夕走燐
飛螢也中有菴茅茨弗剪佛半老朽不辨面目僧之
住持者未月而避八九山人陳慧通見而悅悅而往
居同人力止之不從徑去戊辰春余嘗同客泛舟遊
茲山矣山半有塘半爲草茸由塘而北轉得平地畧
畝層級而上入菴禮佛畢出菴後野壙之南短竹藤
網徑道蔓塞客促返舟徑下予以手劈叢行七八十

公安縣志

卷之七

藝文 序

三

步得柏五六株梅三樹老幹扶疏不知何代物也旁
有泉沮洳未通余目賞心會而林密雲深中聞山鬼
呵聲噫此地景物豈有神護者乎入林里許越岡遇
一老翁貌古而韻致不減偕二小童咏曰攜手來
春林林深失去處仙犬雲外吠吠入桃源渡予傾耳
久前叩其姓字翁俯不答飄飄自前蹊去予悵然返
舟則已夕陽在山矣今陳山人往居書此送之不識
庵前淒涼景色其改觀焉否庵後古相其改柯焉否
梅之拳曲虬盤噴其幽香者尙如昨焉否昔之詠歌

而自得者能復遇焉否

東門護城堤記

袁宏道

公安治倚江江水齧岸者百有餘年至近歲遂割城之半以予水議者畫爲三說以上一曰避勿與爭道也將盡撤其堂皇閭井以就高而公私困竭不與者十常七也二曰築堤於江之上流以殺水堤虹偃而出水勢北走迤南一帶庶免衝激而勢湍速投之石未必膠委千金於洪流途之人知不可也三曰疏二聖洲之故道以分江勢夫江身在南水去原而就洪

公安縣志

卷之七

藝文記

四

疏之不勝淤也策乃下會直指使者應公行部至邑愀然嘆曰江患逼矣而江議迄無定畫居者危危若簣下之火愚則處堂抑豈無智者也江防使者徐公進曰適有薦紳大夫言未竟也邑三面負堤而缺其東孟公堤垂右臂下楊令增其支爲前障往年江決東門邑居漂盡者左臂虛故也邇來江患少定幸萬一之復而峻其左可以墨守此百世之計也應公曰善是邦也詘詘又不可以需則爲邑出緩若干監司郡大夫而下捐貲各有差閱月而堤成邑士民相與

歌舞於市皆曰微直指使者重念災國不及此子與
曰以佚道使民則不怨況其不使且爲出貲以貸命
也一時善形家者皆言邑形勢自西北來後疊而前
削截之以堤則氣畱畱則能爲諸祥且於邑爲左左
屬龍也地宜豐形勢之所資也是役之興盈庭之議
頓止自忠襄公以來未之有也

儒學梁公生祠記

袁宏道

天之大也無所不有而非挾其有以角也聖人亦然
使天曉曉然與春爭華與秋爭實與萬物爭洪纖大

公安縣志

卷之七

藝文記

五

小天亦物耳故聖人之大以受不以勝天下之爲道
者歧真其道皆竊吾近似者也吾僕役之則吾用而
角之必且外吾而求張故以宣尼之聖而識小師老
聃問道不以是貶大暨於後儒挾吾之所有以求勝
而吾之道一變而儒始名再變而儒退然居九流之
列三變而儒乃有爲異道用者是則角之而張者也
且夫諸子百家固未有能出吾範者也焚而爲名法
比而爲楊墨遁而爲老釋唯其竊吾似而甚焉則指
之曰異學而實不出吾之所有夫聽所言觀所行譽

所試是聖人未嘗不名家也春秋之斧鉞雖隱必誅是聖人未嘗不法家也吾蔬食而愉快其樂我席不溫轍不解其愛兼是聖人未嘗廢楊墨也寢有經食有戒是聖人未嘗廢攝生也幾研於未發道竟於無聲臭是聖人未嘗廢虛無也唯其無所不有而出之以平淡故其大至於不可名異學者竊其一以求耑其譽故迹詭而言放以爲不如是不足以自崇其道而不知千變萬化皆不出吾儒之固有吾取其精以供吾用而汰其甚告之以所蔽彼亦且樂爲吾用吾

覆之以天臨之以君庇之以父母彼安敢出而爲吾害唯吾自挾其道而與之角居然以敵名予之而彼亦傲焉以敵自居於是異端之禍與吾儒相終始名曰尊吾道其實薄吾藩而益賊以戈者也孟氏善衛道者其言不過曰歸斯受曰反經而已矣反經者使天下曉然知常道之大而本之身以措天下皆綽綽然而有餘吾常有餘而彼不足又安用借貲於彼天下皆知吾之不借彼所謂濯龍之宮白馬之舍其黨不得不少而道自衰此所謂不攻而破者也故今之

欲廓吾道莫若遵孔孟之家法而明其書暢其旨先是中丞梁公以監司臨敝邑見學宮圯慨然捐鍰新之每至邑則進諸生徒告以聖賢之微旨其言樸直無雕飾已又出書傳若干多先儒之所未發蓋公之所以衛道者與孟氏反經之旨千古若一券也昔者昌黎氏衛吾道徒爲忿激之論而不標其本是以介胄衛也夫介胄所以攻非所以服也今公第發明孔孟之深旨使人知道之無遺覆而諸子百家無異載此猶禮樂盛而悍獷銷聖門之伊呂也邑士民戴公

公安縣志

卷之七

藝文記

七

誨爭請祠公邑錢侯聞之甚喜曰是王政之大者竟如士民請祠成以記屬余余拜手曰公他日當俎豆於白沙諸公之間者也然使後世知邑中有聖學自公始公之從祀自敝邑始一時令長師儒薰其德而快其事而不肖某得以文字濫其役是皆不朽之藉也公名雲龍廣之瓊山人楚人戴公如羊叔子今者特祠巒序閒故畧述其功在聖門者其他威惠不具載以俟異日志峴首者

儒學周公生祠記

袁宏道

邑學宮舊濱江江水齧其址宮遂遷邑頻歲苦陽侯殿材蠹過者岌岌然慮其壓則以孫木贅之又十餘年而贅者蝕其半邑人相顧嘆惋竟不敢議興革夫邑之薦紳大夫以至縫衣緩帶皆誦法孔氏者也積縷而緡積塵而嶽邑之人亦能辦此獨以事重而地卑故不敢不緩其議以俟天子之命吏夫今鄉校雖一鄉其始蓋有所受之小至一籩一豆皆奉功令而行不敢輒增損故學宮之重與太廟等而其興革一稟於天子外焉者遐而不得達則稟於天子之命吏

公安縣志

卷之七

藝文記

八

今夫佛老之舍朝而圮焉夕而呼於市市之屠伯傭保操其興革烏合而集事者何則其事輕也昔李師道請出私財贖魏徵舊宅白居易論奏以爲事關激勸合出朝廷夫此名臣舊第耳當時惜大體者慎且重若是其敢輕議數仞之宮牆與必有所操而後議故下之人不得不緩緩於下而急於上故體統尊而事行古之爲治者政學出於一故曰在泮獻囚在泮獻馘後之人特以爲文章之具觀故其修舉常後於官寺區署一有興革直付之一二章縫而其事僅與

釋老之宮等於是學宮始輕而絃誦之地鬱爲苔蘚
後生末學有經年不窺夫子之門屏者是亦爲政之
責也監司周公醕儒也修姱之節聞於天下天子超
常格拔之論者以比胡威陽道州下車未浹月威愛
遂行聞邑 大成殿敞卽與前分守梁公捐貲撤而
新之旣命有所操無失體眾力遂集而邑人士數十
年嘆惋而不敢議者一旦如釋重負宮旣成邑錢侯
率諸薦紳士落之皆曰非公余等何顏復見先聖洩
洩然如唐子之久亡而忽見其鄉也則又曰邑公之

公安縣志

卷之七

藝文記

九

畏壘也將世世子孫俎豆公舍學宮共安之遂並梁
公兩祠於宮之左公名應中浙之會稽人夫非謂學
宮之能重公而學宮待公而重將使後之作者知其
重以時加修飾而後生末學望宮牆而肅然是祠之
所以作也

白蘇齋記

袁宏道

伯修賦性整潔所之必葺一室掃地焚香宴坐而所
居之室必以白蘇名去年買一宅長安堦上竹柏森
疎香藤怪石大有幽意乃於抱甕亭後潔治靜室室

雖易而其名不改其尙友樂天子瞻之意固有不能一刻忘者詩云維其有之是以似之予謂維其似之是以好之也夫不能似之而好之則其好之也爲浮蓋予少而侍伯修山中長而依於宦邸歷求其生平與兩公眞有大同焉者吾觀樂天子瞻爲人大約皆眞實淳篤不立城府而伯修亦溫良重厚胸中無半毫鱗甲是其心同也樂天典大郡所攜不過天齋石華亭鶴折腰菱晚年買履道里宅至鬻駝馬子瞻雖處顛沛不輕規取絲毫無田可歸竟至流落而伯修

公安縣志

卷之七

藝文記

十

賦性梗介泊然自守雖居官十餘年無異寒士終不以隻字干人是其操同也若夫醉墨淋漓於湖山閒情寄託於花月借聲歌以寫心取文酒以自適則樂天子瞻蕭然皆塵外人而伯修少有逸興愛念光景耽情水石塵鞅之暇招攜二三雋人或高齋聽雨或射堂看月城內外剝菴遠自西山以至上方小西天諸處鼓舞同侶遍往登臨是其趣同也樂天子瞻其文詞皆爲一代宗匠而伯修少時操筆便有新意予遊天下多矣若詩律之脫而當文字之簡而有致亦

未能有勝伯修者過此以往又焉可量是其才同也
樂天子瞻雖現宰官之身皆契無生之理而伯修叅
訪旣久塵心久絕是其學同也其不同者兩公矯矯
諫諍覺風節外見耳然是時樂天身爲諫官子瞻起
家制科皆有議論之責今伯修方侍春宮育養元良
旦暮陶鑄天下養其身以大有所用豈出位而言效
制科人之習氣以爲極則乎假使伯修爲諫官其又
肯默然耶是亦未嘗不同也昔子瞻亦自以爲出處
老少同於樂天蓋庶幾此翁晚年間適之樂而老爲

公安縣志

卷之七

藝文記

十一

逐人卒飄泊於蜚塢獠洞之中竟不得與樂天同樂
蓋有故矣樂天當朋黨甫動時卽奉身而退爲散官
爲分司而子瞻自元祐以來徘徊公卿閒如食蔗然
曾不爲引決之計故宜未幾而禍生也樂天懷知足
之情子瞻多幹世之意然禍福之幾亦可畏矣今伯
修官漸高祿漸厚然每見必屈指謂予曰吾數年內
歸矣嗟乎伯修近日所欲同而吾輩亦必欲其同之
者其尤在白乎其尤在白乎

遊荷葉山房記

袁宗道

予別邱墓三年矣今年夏予與二弟至里中拜於松楸而憇於先居先居傍有荷葉山喬木千章今日諸叔偶不見召日暮無事乃與二弟步於山中擇高阜處藉草而坐因思兒時常騎羊來此每一至不啻如四五十里外而今視之數步耳山之蒼蒼水之晶晶樹之森森自少至長習而安之不見有異今偶遊焉而覺其幽靜翳鬱愛玩不能舍去久矣夫予之在城市也俄而月色上衣樹影滿地紛綸參差或織而簾又寫而規至於密樹深林迥不受月陰陰昏昏望之

公安縣志

卷之七

藝文記

十一

若千里萬里窅不可測劃然放歌山應谷答宿鳥皆騰噫嘻予生於斯長於斯遊戲於斯二十餘年而猶有不盡之景乎徘徊欲去而有聲自東南來慷慨悲怨如嘆如哭卽而聽之雜以轆轤之響予乃謂二弟曰此憂旱之聲也夫人心有感於中而發於外喜則其聲愉哀則其聲悽女試聽夫酸以楚者憂禾稼也沉以下者勞苦極也忽而疾者勸以力也其詞俚其音亂然與旱旣太甚之詩不同文而同聲不同聲而同氣眞詩其果在民間乎語終而天風夜起歌聲漸

近二弟無言予亦嘿嘿聲之悲怨有加於初嚮之歡
適者化爲悽愴矣遂相與踏月而去

柳浪湖記

袁中道

郭外西南柳湖與斗湖一湖也長堤間之爲大道達
於南門其內爲柳浪柳浪滙通國之水穿橋入於斗
湖柳浪實湖也田之然常浩浩焉獨其中高阜者幾
四十畝可田絡以堤堤內外皆種柳及楓帶以渠渠
樹之內始爲田田之內地較阜復爲堤周之堤上復
種柳堤之內前爲放生池種白蓮亭臨之後漸阜爲

臺臺之上則柳浪館在焉爲室三楹環以梁臺上及
渠內外皆種柳凡堤之襲者三渠之襲者二樹之襲
者六若筍蕉若陣若城翠碧醞釀不知紀極放生池
堤外右有窪地不可田樂橫堤與田隔中種紅蓮水
中有洲爲室三楹以待名僧及過客也右爲小堤以
出是爲門徑左爲小堤達於柳浪館欲泛舟則繞臺
下從右出橋下達於放生池盤旋亭前折而右穿橋
至紅蓮池繞僧舍而西穿於後渠後渠西可達斗湖
水最濶返棹仍從後渠達於左左旣則前望見臺上

朱欄畫梁隱隱繞而右後還後渠遇僧舍從紅蓮池
舊路歸焉可二里許日午渠內無曦暘濃樹遮樾參
差見碎天水清徹底此柳浪大略也暑中中郎與予
坐臥其中辰起偕數僧塵譚倦則泛舟月夜尤佳常
有一客苦熱夜來避暑忘攜襪夜半凍欲絕樹凡萬
株種楓柳者宜水也楚中柳色止一月黃落入秋楓
葉紅酣如錦土人云後有篔簹前有柳浪篔簹爲予
居柳浪爲中郎別業也

錦石灘記

袁宗道

公安縣志

卷之七

藝文記

十四

余家江上江心湧出一洲長可五七里滿洲皆五色
石子或潔白如玉或紅黃透明如瑪瑙如今時所重
六合石子千錢一枚者不可勝計余屢同友人泛舟
登焉淨練外繞花繡內攢列坐其上似在瑤島中余
嘗拾取數枚歸一類雀卵中分元黃二色一類圭正
青色紅紋數道如秋天晚霞又一枚黑地布金彩文
約如小李將軍山水人物東坡怪石供所述殊覺平
常藏篋中數日不知何人取去亦易得不重之耳一
日偕諸舅及兩弟游洲中忽小艇飛來一老翁向予

戟手至則外大父方伯龔公也登舟大笑若等謗我
取樂次日送遊錦石洲詩一首用蠅頭字跋詩尾曰
老懷衰颯不知所云若爲我塗抹雖一字不畱亦可
嗟夫此番歸去欲再覩色笑不可得矣

二聖寺遊記

袁宗道

甲午清明諸舅率余兄弟出東門踏青行二里許至
二聖寺息焉寺僧具茶菓仍出余少時題壁詩每漬
蟲蛀似觀古人墨蹟不復知爲少時筆也寺有辟支
佛牙方長寸許凹凸處如古篆又有宋黃衣使者敕

公安縣志

卷之七

藝文記

十五

絹墨若新僧爲言往有趙松雪羅漢卷已入故相家
今存其贗者其松雪本覽畢出禪房倚門外叢樹問
僧二聖因緣一老僧答曰二聖寺載芬陀利經中其
顯異則始於唐此中老宿相傳唐某年邑令與沿江
居民一夕同夢神人來告明日當候我江干次早官
民相驚候江上有沉香二根逆水而上相率牽挽而
至岸忽行者自西來云此木奇甚然非我等莫能雕
飾乃令官民移至安遠寺殿中闔扉七日煙霧迷空
朝昏莫辨七日以後忽露光明啓扉視之則二像宛

然夾佛而立大約如世所塑金剛威猛異常而杭州有商人某者舟出楊子二童子求附舟至暮謂商曰今夕當爲汝牽舟但莫行卽速也至夜舟行若飛耳惟聞風濤聲商穴蓬窺之惟見二金剛挾舟而翔懼甚不敢復窺比曉舟已達寺傍問知爲南郡公安蓋一夜行三千里矣商大驚起視寺中佛邊所立二像卽昨日挾舟人也商愈駭方欲瞻禮亦立化像前眾僧聞之競來瞻禮商顛頰忽長眼突而頰儼若龍形食頃復活告眾僧曰吾二聖護法龍也二聖一爲青

葉髻如來一爲盧至德如來皆過去恒沙劫前寶藏佛授記五百童子之二歷百年後吾肉身當有難然不敢加害更三百年香像肉身方歸劫火言已復暝眾僧爲漆其軀祀二聖傍卽敕所謂黃衣使者也黃巢之亂賊見像抽矢欲射像忽汗出若雨賊大懼引兵去一邑獲全至宋某年寺果火年月一如所記余因嘆佛法在周末時芬陀經之入在六朝時而青葉盧至之跡顯於唐者與經所說若合符券嘻何其奇也同游俱攜有酒肴布席門外樹下各賦詩一而歸

歸憶此古佛獨顯異於吾邑而他處招提卽未見有
供二聖像者亦法苑中一僻事也遂篝燈記之使局
士觀此知佛法者廣大不可思議

培風書院記

夏策謙

書院之設所以宏文教育英才講學肄業養成材器
爲國家用自昔楚有嶽麓與嵩陽應天白鹿四立爲
大而各州邑因其名地爲游息所者不一總以作育
人才亦綦重矣公安自宋端平間孟忠襄公爲竹林
書院以處一時流寓之士而後莫有踵其事者卽明

公安縣志

卷之七

藝文記

十七

之中葉袁氏三珠樹起主盟騷壇遂有公安亦止各
適其適而已今日者

聖天子崇重儒術薄海內外家絃歌而戶誦讀而我邑侯
楊公尤加意作人甫下車首葺

學宮於茂草中復修諸葛公寇萊公兩祠堂並新鄉賢
之宇薦楚三閭大夫神主捐修邑志凡此皆關教化
之大體然而邑荒多故俸薄割截亦已甚已曩者諸
生通名以摺公令倣江南例概以刺鄉會二試贖錢
有加禮所以崇斯文養士氣正所以勵廉恥鼓藏修

也至於館穀義學在新建之寇公祠而公以地無專屬非所以居靜業嘗言得城市山林之處規而恢之庶乎暴無寒至於古教之之義始稱於時紳士父老咸相與謀曰楊公六年來一舉一動必爲我田疇子弟計眞父母也善事父母者先意而承志盍以我眾擎之舉慰公難汲之深眾稱善適居人以所居求售其地爽塏其屋廠庑在北城內前臨街街南面後暨右有園園有水有竹有樹想春風鳴禽秋月篩影諸生以時習禮講課吟咏其間亦公安新邑之大觀也

公安縣志

卷之七

藝文記

十八

啓公閱視公喜顏之曰培風就遷義學師弟子而學焉予以苜蓿一席親炙盛事樂爲之言今公且以內召去異日者卽以俎豆公爲去也思者不第爲去也思豈不與召棠狄樹並垂遺愛也哉始購得基宅七十五金修理續費約百金捐金人多不能記

重修武侯祠記

李也白

邑名公安因漢昭烈也而當日之以仁易暴諸葛公輔相之力居多故邑之祀名宦首武鄉乃孱陵街大道之北又有專祠襟河流而帶湖澤南面對黃山不

知始於何時或謂先是以祀呂蒙明季進士劉珠醜
呂之昧於擇主詩以誚之祠一夕火因改祀焉今祠
前門石柱屹立有漢業鼎新二表見出師之意蒙城
廟食千年愧僭賊之心之句爲劉所題聯考古祀典
五而諸葛公兼有之能致其主翻然翱翔於蹈虎涉
冰之餘而猶能以德施民尸而祝之雖日人心不死
然非君子之不可喧不及此祠之廢興不知凡幾自
明末流寇一炬七十年來赤棘黃蘆徙增過客感慨
歲己亥夏仙田楊公卽其舊址捐俸修之爲正殿三

公安縣志

卷之七

藝文記

十九

楹奉安神主傍作兩廂房週以墻前至舊石柱而止
爲門門內亦三楹且購得暝近之士課其毛以食廟
祝一時父老相與流嘆曰茲役之繼寇公祠而起世
道人心之大幸也 楊公之誨我子弟計深且遠固
非不學無術者所敢知也 楊公之德其又可忘也
哉祠之成閱兩載約費百二十金是不可無以記之

竹林萊公祠堂記

元 劉 坦

忠愍萊國寇公障蔽於讒謫死瘴鄉喪歸次於公安
野祭插竹旣乃芽茁竟成修林後人卽其所祠之今

餘三百年西洛薛君友諒來令茲邑伏謁祠下顧瞻遺像與家藏本不相似命工改作並神宇更新焉垂成而代至乃屬邑士徐森成之既成將伐石爲記俾圖授簡則相與言曰竹植物也於人爲君子當其雪霜寒擊萬物盡凋獨挺然不改其操春雷發榮遍地而出蟄焉固也今是竹出於芟夷之餘非有宿植而生意勃不可遏謂造物者表公之節非邪公出在朝無所阿附小人噂嗜必欲置之死地不知公之處死也素矣百世之下聞風興起凜凜猶有生氣彼丁謂

公安縣志

卷之七

藝文記

二十一

王欽若輩雖衣冠廣庭視之若泉下人終與草木俱腐而已薛君景行先哲竭虔而妥靈恐其貌弗克肖其德必有與之肖者矣夫貌表於外者也德蘊於內者也臨大節而奪遇外患而怵朝夕身親炙如隔宇宙尸而祝焉其顙顧不有泚哉祠成之後甲午四月竹生於楹一本兩岐瑞應圖牒夫是竹也植萌於肇祀之先駢產於新廟之變謂以是表公之節千萬世不易吾言矣其在後之人善封殖之庶無愧於公亦無負於人之望云

重建學宮記

趙申喬

公安爲三國用兵地其在於今則荆南屬邑也邑舊有學屢燹於兵歲久不治許縣尹磐慨然念之偕魏教諭士俊楊訓導兆儒因紳士僉議捐修請之魏郡守勸報可而後庀材鳩工尅期告竣煥然可觀又新鄉賢名宦之祠於櫺星門之旁增祀有功德斯邑者以桐鄉遺愛之故論先大夫治績久而益定升進几筵事在壬午冬十月之望主已薦矣越匝月會余奉簡命察審鎮筮紅苗之案輶車過焉肅謁祠下焄蒿悽

公安縣志

卷之七

藝文記

廿一

愴感念音容屈指先大夫去官之日與茲瞻拜之期相合事會適逢夫豈偶爾因歎甘棠舊澤已閱六十年往矣而三代直道猶在斯民孰謂今人之心必不逮古哉學博率其庠之弟子乞言於予予方戴星復命東下迎

鑾匆匆未果爲未幾由浙調撫楚南所駐長沙距公安不越數百里追思先德靈爽式憑爰爲之說以勗多士曰古昔盛時立學造士自成均逮閭黨皆有師也是以上無私師下無私學周末王道寢湮士之不得

位者輒相與授受於山野觀洙泗西河鄒嶧之前事
可見漢興迺重經學歷考關西濟南瑯琊千乘生徒
各不下萬人數葉之後習其傳者必曰出自某師良
亦專矣要不可謂之非私學也若夫王道興則師道
公諸天下今非其時乎多士生長同風之世遭逢
堯舜亦知

朝廷養士之意不專科舉而實望之以希聖希賢之學
乎善乎王文成之言有云殿廡堂舍拓而葺之餼稟
條教具而察之是有司之修學也求天下之廣居安

公安縣志

卷之七

藝文記

廿一

宅而修諸其身是爲師爲弟子者之修學也公安卽
彈丸乎代多聞人科舉登進不足爲難其聞先王大
同之教雅忘修身治心而深疾夫馳騫功利之寵者
將必有人焉從此噓染成俗上應 昌隆因而逃
聽風聲雲蒸霞蔚能遵

天子崇重 先聖之道蒸蒸日上比戶可封始信德教
覃敷不於山野而於庠序公安且歸首庸焉詎不休
哉先大夫在任曾力爭公安取士之額遠不逮江陵
侃侃學使者前必得所請後已嗣此士風翕變文章

經濟卓犖一時正圖拔本塞源養士於庠以期澤諸
道德結竟楚才之盛顧以輯瑞北征斯志不克終遂
矣幸值闕宮之有恤而闡幽典行多士徘徊棟宇瞻
想儀型能無油然而興起於佾舞工歌之際乎是則余
之稱引弗後仰體 廟堂之良法美意以詔告多士
實本先大夫設施未竟之心殆亦不出邑紳士踴躍
樂襄之志矣夫雖然甯獨爲公安一邑言之也哉列
其崖畧郵畀兩學博刻詞麗牲之石所糜白金若干
緩及經始落成月日具著於籍以非其大者不復書

公安縣志

卷之七

藝文 記

廿二

重新學宮記

沈爾燦

公邑舊治濱江自明季戊辰以後城再遷學宮規樞
略具陵谷代更洊經喪亂其人士僅以自保殿廡間
幾於鞠茂余奉命來尹茲土每月吉祇謁未嘗不怒
焉憂之顧歉歲力勿遑也會富川鄧君以司訓主教
事屢謀於余併力圖其事次年春度地於學宮之左
創啓聖祠三楹厥工甫竣夏四月隴雨毀宮之後壁
殿材且半蠹循牆蹶踏岌岌乎隕墜是懼亟偕鄧君
悉捐俸入庀材糾工易其甍之缺者而堊焉汰其木

之□者而斲焉五閱月門觀旣壯繚垣漸週凡此皆體國之常經肇造新邑以來數十季荆榛灌莽以有待於今日者也嘗論世數之污隆與文運之顯晦相爲倚藉公邑魁梧大儒如王襄簡鄒莊簡以高第乘時策勛譽流竹帛近代三袁先生領袖科名主持風雅海內士大夫樂得而道之曾幾何時而芳徽不再鼎興數十年僅以戊亥間鳴其盛豈運會之推移抑絃誦之聲少衰息耶夫上有好爵之縻下有媵修之立舍是則維鵜貽刺矣歲周星紀景運其昌午之秋

公安縣志

卷之七

藝文記

廿四

邑之人文蔚然丕振

天子方側席求賢經明行修之選登進無少遺誠以是時端父兄之教慎子弟之率尊聞行知以絕隱怪之趨敦詩說禮以安雅言之訓而以歲時陳俎豆習干羽於中將業日修而德日進彼洋洋歌鹿鳴兔罝而來者非其嚆矢乎太史輶軒採風卽以之比美齊魯焉可也是余之有事於新宮而不能無望於後起之士也

寇萊公祠堂記

龔三捷

皇帝御極五十有七年著雍闞茂之歲我

邑侯廬江楊公蒞治再期月政通而人和慨然念宋忠愍萊國竹林祠堂之鞠爲茂草也曰寇公之生而爲英役灘神感鳴鹿死而爲靈令道傍旣折之竹復生雲車風馬在帝左右其不能忘情於茲也可知承平旣久野火寒烟中不得一盂麥飯此都人士之羞守土者之責也顧遠蹟在邑舊治南明季邑再遷舊治爲天吳割截垂將盡祠址去江遠不三百步而岸又善崩眾皆疑之侯曰噫籌之熟矣盤庚五遷云胡

公安縣志

卷之七

藝文記

廿五

不國於是捐俸薪卜爽塏於新城之北亦傍大道縱橫若干步置屋上下各三楹上爲臺高三尺許奉神主使登降可觀下爲堂以待游息之過客兩翼爲書舍若干置館穀以處誦習之師弟子前對湖光千頃望松滋眾山秀出雲際如笏如圭如卓筆溪河千里曲折而來下合便河再合港口分江之水而始南週以繚垣內盡植竹間以楊柳隙者斲樹蔬爲劃粥資南截大道仍闢門與城之北門相對使靈淑之氣相貫注顏其額曰竹林寇公祠有奸雄過此能無仔細

思量耶或又疑之侯又曰祠之不南面而西面者避
壅蔽選形勝也昔寇公之令巴東移邑治於白鹿崖
之麓諗江流之有情不忍背之飭其署北向手植雙
柏後人比之甘棠焉今祠傍作南門與城之北門夾
道而通行者亦將爲不忘當日鎖鑰之意也眾皆喜
釀而落之則相與言曰竹之爲物虛中而高節不畏
歲寒其葉似鳳毛其笋號龍孫其於人稱爲君子公
安何有於寇公其所以示靈異於此君此土原非偶
然初以羽流主祀事號竹林道院孟制置擴爲書院

公安縣志

卷之七

藝文記

廿六

理宗親灑宸翰以賜之而四方流寓之士之至者如
歸後三百年西洛薛公諱友諒者尹茲邑正其遺像
新其棟宇時則有竹生於楹一本兩歧之瑞明世廟
初邑人大司徒莊簡鄒公諱文盛者題請祀典大抵
祠之由廢而興存乎其人孟薛踵其事而鄒增其華
鼎新以來蕪沒者七十五年而有待於今日侯毅然
以獨力振興之直改卜焉清風袖裏費若干金創之
功遠過於繼雖祀典未易驟復而作廟翼翼依然舊
觀寇公之靈妥已侑已侯之急先務而大有裨於人

心可以不朽已太史採風而上之

聖天子必將曰吁黎民於變賴有此耳

藏書記

鄒美中

余性嗜書每試輒購數簏以歸邑業制舉者咸目笑之余竊以之自多人事之弗知飢寒之弗恤晦明風雨手一編不輟也漫畫之鳥蠹字之魚大都類是書舊藏西林山房懼其散遺移於宅之西廂室數椽不能容兒輩議改藏他所余方疾聞之謂與其藏之無甯散之率愕眙謂是病中寢語也余招而進之曰士

公安縣志

卷之七

藝文記

廿七

豔心於科名久矣副墨之子挾兔園冊數種會逢其適亦能掇巍科負大名以去而余也窮年兀兀妄希稽古之榮神疲力盡究竟何裨猶憶十年前偕友人夜坐縱談酒酣耳熱悵江河之日下迴狂瀾而無從友人曰君果欲階何科目也今之士類皆章句之外無學術帖括之外無文章應酬之外無經濟然非是而望針芥之相合難矣子顧噓秦坑之冷灰蠹漢臺之殘簡所學非所好吾惜操瑟而來者不早挾瑟以去耳縱有汲冢誰搜竹書何如百城徒擁萬卷吾子

休矣吾思之吾重思之覺其言有足以警余者且夫古今猶旦暮也白頭可期汗青無日一邱之貉恐終不免爲所噉盡異時能致青蠅作弔客否耶故曰與其藏之無甯散之兒輩曰是固然然若大人言則與其散之終不如藏之之爲愈也屈指而計吾邑之業制舉者眾矣數十年來要未見一人掇巍科負大名以去也抑又聞學古而遇知己得則俱得否則尙有一得焉其弗信矣乎余曰有是哉而乃見及此哉甫再欲有言聞剝啄聲甚厲則故人李春溪踏雪來圍

公安縣志

卷之七

藝文記

廿八

爐話舊偶及之春溪因言江陵居停主人藏書甲一邑然吾聞其牙籤萬軸縹緗燦如而竟至今新若手未觸者則又何也

學田紀畧

許 馨

從來郡邑之設首隆 學宮重文教也士苟薰陶既久必能矜名節抑奔競雖操瓢與簞凜然持稼穡狩獵之志而聖君賢相惻然念之廩餼常數外復有學田典綦隆矣獨是田無定所畝無定額故儼然號名邑而敦詩說禮輩或致難以自給雖歷奉上行以無

礙官區撥充而侵漁隱占視公地爲私物者往往有之脫不加意剔釐將膏雨之沛實去而名存單寒之儒籲天而無從也公安撥充之學田止椒園一處爲田無幾歲入有限欲仰給於中者人有石田之嘆欲家分升斗不亦難哉幸賴 司士顏先生自癸酉至己卯經營六七載動費數百金 司訓楊先生丙子受事後翊贊以終其美則延袤數百畝矣有放馬官湖一區有沿江廢堤數處曰官湖則非民田也曰廢堤則非民業也而兵燹之後考核無從竟爲豪強所

公安縣志

卷之七

藝文記

廿九

竊據於康熙三十一年庠生李之芬龔三捷等具控前署事吳當是時 顏先生秉鐸茲邑已一年矣隨詳請 府憲魏公轉送 糧憲李公明鏡高懸羣蟻盡消由是侵奪者還隱占者復通詳各 上憲而其案始定磐承乏茲邑檢閱前案未嘗不斂容稱嘆以數十年未有之業一旦楚得楚弓豈其不廢一財弗勞餘力頓致羣小俯首聽命耶卒能鋤奸去弊使眴晦釐然樹種稔以穀士子者誰之賜哉事旣成 顏先生邀余履畝踏勘爰是逐一丈量經界四至罔弗

條分縷析放馬湖一處計地四百六十七畝四分八釐廢堤十處共地一百七十四畝所入之租據實造冊所給之人照冊分領俾彈丸不失之豪強絲毫必給之寒儒以廣

皇仁以資絃誦臣職也亦師道也異日諸君子相與食租衣稅稻稭既登稽古益力爲大儒爲名臣邈所自來知學產經理有人翊贊有人其無忘此日鮒涸之仁恩也哉

福井先生集敘

袁中道

公安縣志

卷之七

藝文記

三十

蓋予少時誦福井先生詩而知其爲才人也已得先生疑菴諸集讀之而後知先生爲學問中人也先生少具穎異之才下筆數千言立就安世默識世叔強記殆無以過焉顧其所爲歌詩不唐不宋直攄其意之所欲言蓋無心於雕龍繡虎之名而獨一其志於學乃先生之學不浸淫於二氏而一稟緇林爲繩尺又親見當時之聚徒講學者徒鸚鵡其舌質之生平如縷冰畫空都非真實故一一具諸履踐以其身爲圭璋乃世或曰先生晚達蓋功名富貴中人也或曰

篤行君子也皆非也當江陵相公盛時先生與爲布衣交溫蠖其跡而潔白其心以先生爲介也耶則每計偕往來平津邸中爲上客卒未嘗畏其薰轅急逃之以爲高以先生爲通也耶則其指日回天之勢稍暱就之功名可唾取而先生白首乃得一第浮沉郎署間竟未嘗獵取一班一級以沒彼時與槐柳齊列者見馮子都王子方輩作刺刺可憐色而不足以當先生之一盼春蠶腐鼠豈堪點其胸次蓋鷗機雖忘龍性難馴不可得而親踈榮辱先生於道也幾矣昔

公安縣志

卷之七

藝文 敘

卅一

子瞻有言人生如國手碁末後畧贏數子便是勝局先生少時佗僚不遇人或有賈島孟郊之嘆而晚年不隳用世之志竟取青紫馬文淵所云窮且益堅老當益壯者非先生烏足當之先生著作甚富其涉於風雲月露者盡汰之獨存數種而以疑菴名其篇夫疑者悟之因也昔楊慈湖於學大悟一十八遍小悟不計其數蓋屢疑而屢悟也故儒門之學慈湖最爲光明先生以疑自居非苦心於學者烏足知之則先生於道已深矣先生之孫世臣從游中郎先兄之門

最久極得其沾衣霧露之潤是不媿先生之箕裘者
手持是集示予予畧述其梗概歸之若先生行事之
蹟具中郎邑乘中已有虎頭傳其神矣茲不復贅云

敘高氏家繩集

袁宏道

蘇子瞻酷嗜陶令詩貴其淡而適也凡物釀之得甘
炙之得苦唯淡也不可造不可造是文之真性靈也
濃者不復薄甘者不復辛唯淡也無不可造無不可
造是文之真變態也風值水而漪生日薄山而嵐出
雖有顧吳不能設色也淡之至也元亮以之東野長

公安縣志

卷之七

藝文 敘

三十一

江欲以人力取淡刻露之極遂成寒瘦香山之率也
玉局之放也而一累於理一累於學故皆望岫焉而
却其才非不至也非淡之本色也里高氏世有文譽
而遂溪公尤多著述前後爲令不及數十日輒自罷
去家甚貧出處志節大約似陶令而詩文之淡亦似
之非似陶令也公自似也公之出處超然世味似公
之性公之性真率簡易無復雕飾似公之文若詩故
曰公自似者也今之學陶者率如響榻其勾畫是也
而韻致非故不類公以身爲陶故信心而言皆東籬

也余非謂公之才遂超東野諸人而公實淡之本色故一往所詣古人或有至有不至耳余束髮已知嚮慕公近者吳川公梓其家集始獲盡公及尚氏三世之藏吳川公者公仲子高才邃學先兄庶子之師也爲令以伉直著聲閱數月亦去遵先轍也懷公集三十年出入必俱今春始成帙遂以先王父孝廉公三詩賦冠首而已所著若干卷綴其後孝廉公之生甫二十有二歲才思澎湃如川之方至吳川自出機軸氣雋語快博於取才而藻於屬辭比之遂溪蓋由淡

公安縣志

卷之七

藝文 敘

三十三

而造於色態者所謂秋水芙蓉也昔陶氏五男不好紙筆而遂溪之後雲蔚霞起豈黃頭歷齒所敢望哉王元禮論家門集曰史稱安平崔氏及汝南應氏並累葉有文才所以范蔚宗云崔氏雕龍父子三世然未有七葉之中人人有集如吾門者也余邑不能文而恥言文最爲惡習獨尚氏能世擅其業噫彼安知烏衣諸郎爲史所豔稱若此也

中郎先生全集敘

袁中道

中郎先生少時慧業弱冠成進士卽有集行世其敝

篋集爲諸生孝廉及初登第時作也錦帆集令吳門時作也解脫集以病改吳令遊吳越諸山水時作也廣陵集去吳客真川時作也瓶花集爲京兆授爲太學博士補儀曹時作也瀟碧堂集請告歸臥柳浪湖上六年作也破硯集再補儀曹出使時作也華嵩遊集官銓部典試秦中往返作也蓋自秦中歸移病還山不數月而先生逝矣其存者仍爲續集二卷

新修錢公堤碑記

袁宏道

澤國之有江警猶西北之有虜警東南之有倭警也

公安縣志

卷之七

藝文 碑記

三十四

倭虜之患至於芟夷我赤子蹂踐我城郭而水之虐正等故捍衛之功比於折衝邑故窪澤割江身爲都每入夏後峽水暴漏雲昏天回幾撼地軸白浪躍雉堞出居民望之摇摇然夜則萬雷殷枕甫就席輒彷徨起若此者十餘日或五六日每歲率三四至以爲常倉皇有警則扶白負稚走郭西之斗堤涕泣之聲聞數十里而堤故孟公舊址前此去江遠今蠶食且半文村之水直擣其背萬一水從後決地勢面雖高而方張之怒猝不得洩必且爲旁齧必且爲橫激我

民欲別走則四顧皆壑如均堂之螳急而趨芥及芥一漂不可保則固末如何也已數十年來邑人岌岌議增護堤當事者檄縣覆按竟中革而慈谿錢侯應選以甲辰之秋來牧芟積舉廢凡我民之所疾如其疴不盡其蠹不止也凡我民之所急如其家不擇怨勞險易慨然當之無邀倖無却退邑人士知侯將大有爲遂先以堤爲請而革議者有數瘠畝虞其壓輒欲踵故械侯陰悉之偕今丞周君陞躬自按行見遮道者數輩侯逆問曰是故楊公堤址雖微可尋也若

公安縣志

卷之七

藝文 碑記

三十五

何訴數輩伏曰故堤也何敢言而堤之一角塚壘壘穿之則暴骸避之則廢工奈何侯顧丞笑曰若以余等不習其鄉令賄者曲爲導可謾也叱騶人後去輿蓋與丞偕步叢草間顧謂役夫曰視吾趾所及卽爲堤徑行至關廟前率曠土無半鬣羣輩以爲神皆股慄反走量之得若干丈分丁夫若干名丞周君督率之閱三月告成諸父老有識者謂其子弟曰若無謂此舉易也當江防徐公建議時首爲臺使者言狀使者而下愀然動色至爲出鍰趣具議上而一時狐鼠

竟以他議奪昔出於上而難今出於下而易若謂侯何等父母也江防者舊郡守堯莘也嗟夫今江水之憑陵靖康以後之虜也邑頻徙頻却大似南渡之跼踏幸此堤復我民倚斗堤爲長城聞侯又欲疏北江之故道以分水勢如此則中興可望也諸澤國皆有堤雖甚重而無關司命唯是堤與我民爲存亡堤與我民爲存亡故知侯與我民者命也非堤也夫闔外之寄唯命則重余之比於折衝非過也是記也固燕然之勒也

公安縣志

卷之七

藝文 碑記

三十六

修築黃絲嶺堤碑記

毛廷申

公安古夢澤地沿江上下倚堤爲保障而里名茅穗於邑中爲尤下江水自虎渡分流南入洞庭茅穗四里橫當其衝所恃以畋田宅宅者又有支堤一線舊例半請糧夫半役烟戶人自捍患修理期以勿壞無如隣封失守餘波往往及我卽如去年丁酉夏秋之交我稼未穡江陵上流堤決滄沒我田廬邱墓幾盡我楊公下車未及期月顧飢溺猶己德性自然卽往相視謂父老曰水自他來我不得以身塞洪流爲今

之計不若急築黃絲嶺則茅穗西北尙有一隅可以
託足人民幸無遠竄計被水於闔邑八分之一我又
不得爲民請 命惟約少緩催科耳言下惻然聞者
莫不嗚咽一時感激更相告語不忍離徙且勉爲輸
將然而澇荒之餘亦憊甚矣公知之初冬檄修舊堤
無食者不能前公乃割俸爲糴招災民之應有役者
每人日給米一升錢十五文受役者數百三閱月我
支堤遂與江堤同告成功嗟乎爲民父母噢咻而補
助之恒也然無是心則無是政無是政則亦無是心

公安縣志

卷之七

藝文

碑記

三十七

如公以指顧救其魚於倉猝使不至流離捐囊告糴
使不可緩之役汔濟而災民且因以得食是能推周
禮荒政十二而行之以委曲者也只今愚夫愚婦感
念稱述多至泫然誠能動物有如是哉勒石以紀功
非公意也然慶更生而卽康功者不有以紀之都覺
寢食難安故畧記其事以垂不朽

闔邑頌鄉宦侯公碑記

春坊
庶子

文安之

西陵

嘗謂今天下受朝廷股肱之託而動思遠舉以安社
稷爲心者有人矣專喉舌之司而披丹攄赤以弼直

答神明者有人矣職任樞要而賢能行其所學任在軍旅而封疆不倦於勤或省會之一面守土之一方面而保綏賴以無虞休養得其至當比比而然矣要不過體皇上奉天子民之德而各勉焉於其位之所當盡者試方之詩書所稱不懈於位民之攸暨庶政惟和萬國咸甯奚以加焉若乃身居閭巷而賓朋故舊往來雜沓也車馬僕御靡焉相矜也以迨求田問舍耳厭目飫習尙紛如也獨有人焉志安社稷不忘聖明惟恐井里之多事而行所學以加惠保綏休養不

公安縣志

卷之七

藝文 碑記

三十八

殊服官任事之日則誠難哉則誠難哉夫甯矯俗違眾要譽爲名高乎蓋必其天性所成立身有基抑家世清廉遺子孫者厚故忠孝德業天備之耳不佞曩以辛未之春闈分校葩經午夜焚香默禱願得賢良士尤願得之吾楚可相切劘以報國家爐篆縹緲之際首拔一卷乃公安侯君異度理則深厚度則春容詞則宏博想其人必如金如玉鼎鉉可期者及揖見之而對大廷實獲我心旋奉命治邑粵之陽江卓異有聲已拜內召而讀禮家居更聞恬靜寡營手不釋

卷仍然寒窗風味其有心於蒼生可知矣適不佞北上取道陪京舟泊公安之油江口亦將進而切劘之以不違乎初念忽闔邑鄉耆糧長遶揖而告曰唯公知人以有今日亟詢之則頌侯君德爲條其邑利弊於當路而刊行稱便者詞有之曰起我瘡痍解我倒懸匪身爲之實稱象賢其先君子令德綿延桑梓懷恩木鋟石鐫居有間子衿數十輩投刺而進語其事甚詳喜動眉宇謂其鄉先達鄒莊簡公改正南糧省民千金方伯龔春所公疏豁以塞秋稅若干真可媿

公安縣志

卷之七

藝文 碑記

三十九

美流芳公安年苦災疫荷此宏施乞公贈言以勒不朽不佞初心驚而異之嗣乃偵其實不爽也至若君之文學不負科第政事不負天子德行不負前人友弟不負鄉隣總不負不佞之鑒取者也尙有進焉者昔韓魏國公每謂保初節易保晚節難真宰相語也不至惟考之於其終乃見真僞此皆名臣實錄士大夫之規箴可移於官之訓誡者也侯子以此報公安歌咏之情而永終譽也庶有當乎是爲記

重修宮保懷白公故第碑

鄒美中

邑城舊瀕大江明崇禎末宮保懷白公疏遷今治其
東北隅公之第在焉道光十二年江決上游水下注
城不沒者三版耳瀾安後濟南焦明府今郡司馬牧
銓先生奉檄飭修墉堞之頽圯者時有啗宮保公後
裔以重金鬻公之基於官爲射圃且毀垣甃城獲十
鎰先叔父梅軒公慨焉題詩敗壁有王謝舊時雙燕
子銜泥猶傍古牆頭之句託意深微匪第傷心於野
草夕陽已也會司馬佐郡日過此見詩駐車徘徊者

公安縣志

卷之七

藝文 碑記

四十

久之已而仰屋歎曰是非當年遷城以固國衛民者
耶今金墉鬱其萬雉而已顧不能享此一片土高臺
曲池詎堪憑弔其以宅歸鄒氏值勿取嗚乎武子清
風惟餘片石萊公祠宇莫問竹林每覽昔人生長之
區嘯咏釣遊之所大都歌舞旣歇荆棘生焉更數十
百年欲求遺蹟之所在而碎瓦斷甃徒髣髴於冷露
荒烟間旣已蕩爲邱墟隴畝矣設有好事如李子蘭
之於漢陽園圃雖世遠年湮漠不相關之人猶將感
激歛歔而不能自己况爲吾宮保公之子孫乎哉且

夫有功烈於民者皆在祀典而崇鄉賢以慰士民之
謳吟則良有司事也惟宮保爲民人捍萬世之患而
奠厥攸居惟司馬爲國家酬勤事之勞而有基勿壞
惟吾族人士念立德立功之大興肯堂肯構之思則
今之庀材鳩工因舊第而斲礪之黝堊之祀宮保亦
以表司馬也抑吾猶有慨焉宮保公五世祖太子少
保戶部尙書莊簡公第臨邑之白蓮湖府縣圖志所
謂白蓮庄者久爲里人所據其子孫弗能有亦更無
表宅里如司馬其人門戶之故一廢一興能無爲之

公安縣志

卷之七

藝文 碑記

四十一

悲喜交集也哉瞻堂中之俎豆弔湖上之煙波後之
覽者尙有感於斯文

告城隍文

趙希階

維康熙三十有三年六月十三日新任湖廣荊州府
公安縣知縣趙希階謹以牲醴庶饗香帛告於公安
城隍之神曰歲三月己酉膺

天子簡命蒞公安拜命之下悚慙不遑思公安據荊州扼
塞地勢要區自昔聖賢豪傑歷漢唐而宋而元明史
不絕書矣希階章句儒生當此重寄撫心自問其悚

惡不違者非敢爲僞蓋直道其實也今入境循往例
長跪而告於神夫神治於幽者也邑令治於明者也
其同處此土也神於令有兄弟之誼焉詩曰孔懷兄
弟又曰將伯助予故同氣一體義所不容辭亦情所
不忍愬階三十年來困頓孤危足跡半天下民間疾
苦竊幸周知每至津梁歧路觸目傷心又或旅夢聞
雞撫膺嘆息夫保民若保赤子良有司之責也好惡
同民樂只之父母也有其心無其力令固不敢不勉
於力以負 天子然有其心有其力設力之所至

公安縣志

卷之七

藝文 文

四十一

勢有所阻遇有所窮而神且視爲泛常泄泄然而不
知助是神又以負令者負 天子其於孔懷將伯
之誼未有當也令亦何必賴有神哉令堅白自矢見
信於磨涅者已非一日想神之信令者亦非一日繼
自今伊始令之倚藉者惟神神之眷顧者惟令惟神
正直其相令以才猷惟神聰明其啓令以智慧惟神
剛毅其植令以果斷惟神寬大其牖令以容忍令所
不逮者神匡之令所不給者神助之令所危疑而不
能自己者神安全而曲成之俾令以勢無所阻遇無

所窮得勉於力以無負 天子休命與神相終始
斯固以明協幽以陰輔陽天地彌綸之大道也敢布
愚誠尙其臨鑒謹告

募修刻木觀殿文

袁中道

寺觀募疏概不敢錄獨誌此文以風錫類且
以見文士之筆端妙有微旨也

丁蘭者河內人也母歿蘭以木刻母貌祀之最靈喜
愠呈色隣人借鋤蘭適他出妻稟之母母色不允妻
辭之隣人知其故撻扶木人蘭歸見母貌不怡訊之

公安縣志

卷之七

藝文 文

四十二

妻大怒手刃其隣人事聞於官逮之蘭辭木人木人
墮淚逮者以聞官神而貸之遂上聞於朝竟荷朝獎
天下以其孝格鬼神相與尸而祝之至於今不絕事
該三教不宜專屬之道門第以至德精誠上帝所欽
諸仙所重卽屬之道門可也此觀之所由起也里中
舊有觀殿堂已圯先舅靜亭公施屋一所議拆去樹
立而舅氏亡矣表弟晦伯等不忘父志竟如原議有
丁公不沒其親之遺意焉第繕修之費尙自蕭然不
能無望於孝子仁人蓋二氏之說儒者之所不譚故

其不施也非慳也以衛教也今大孝蒸嘗之所爲儒門之所首重正諸儒攘臂捐財時也急相與共出金錢刀幣以廣大其室宇而恢廓其垣墉使一邑之人皆曰儒者之舉動果何如哉向爲闢邪則主慳今爲崇孝則主施慳施得宜所以爲儒者也是疏出而觸發一邑孝子之心舉數十年鬱而未施之財乘此可施當施不忍不施之處而盡出之此一片地當與濯龍青羊諸處同一華整矣何幸如之

題竹林舊隱卷

太岳集

張居正

公安縣志

卷之七

藝文 文

四十四

竹林者萬子榮故居也萬子生於孱陵長待詔宦者署出爲溢內史是時宗藩中益殿下最爲親賢好學而萬子以修潔自將又聰慧穎悟以故得幸於王三年以類奏走京師而余與萬子同鄉里旣相見道故舊勞苦如平生懽已迺向予嘆曰吾聞君子樂其所生而有情之物思不忘本故楚客越吟莊生愛似其致一也吾少有烟霞之想方其隱居修竹之間圖書自娛蓋自謂與此君終焉爾竹堅貞有常性貫四時凌霜雪而不改又盤踞糾結固守其所得君子之止

焉而吾輕去父母親戚遠宦他國舊業日蕪枝柯零落竹不負吾而吾負於竹多矣能無思乎張子曰若是則子之愛竹是得其形而不得其神者也夫得其形則視天下之物皆物也得其神則視天下之物皆我也故竹微物而昔之君子貴之皆意有所愜焉者也夫外直而中洞音中律呂者虛也發萌隕籜筠然葱蒨者文也嚴霜下零眾草俱萎寒色森森與貞松而並秀者節也君子取其虛以宅心可以宏翕受之德取其文以飾聽可以煥至德之光取其節以勵行

公安縣志

卷之七

藝文 文

四十五

可以堅獨立之操斯所謂得其神者也得神而形可忘矣且聖人不撓情於物而委心以任去畱故以天地爲寄跡以四海爲一區若子之言必處瀟湘之間日與其蒼翠檀欒者居而後爲友也母亦與昔人之所存者異乎萬子矍然曰遠哉先生之談吾乃今而得與竹爲友也吾向者之言固旣聞至論請以終身服之

二聖寺碑誌

洪 鐘

邇者

天子神聖德洽幽明瑞兆清和羣牧用命百神效職相與
福茲黎元俾克永享昇平理莫易也邑南服澤國也
濱大江白湧碧翻長堤虹帶資保障焉 朝廷之所
引重當事之所經營而境中父老子弟所不憚其勞
疲修築防護靡有定歲者也癸酉夏雨霑連月水溢
勢近潰邑人大恐出死力支持幾不勝呼號震天地
指青婁二如來暨黃衣使君默祈幽護須臾烟霧迷
望二乞人至曰公等何坐困也言訖就潰漏所徑下
築之半嚮出曰無懼矣吾前治黃河類此去六月四

公安縣志

卷之七

藝文

四十六

日事也時觀者徬徨莫措會疑信半各散歸爲避水
計而近堤居者視江中水潮平趨視築處完固前之
汨汨噴出者似遁旋踪乞不得自是邑安堵無恐長
老爲述寺二如來丙子癸丑顯靈捍水入夢遺事於
是恍然曰乞者非人也其神也謀所以報之夫聖自
東晉來建寺敕封靈異載邑乘諸先輩碑文詳矣而
此復現身低眉伸大手段出億萬生靈於魚腹中則
於斯莊嚴其像輝煌其居在人非以獻媚在聖抑豈
爲竊奉乎顧吾思神受職於天與臣受職於君勿異

也天與君所託爲我民捍患禦災責至重也神克盡其職不以土木享椎祭則神之忠於天也臣克盡其職不以尸曠盜朝冕則臣之忠於君也以今二如來觀夫亦可謂不怠於爲民無欺於天者矣况夫幽贊治理上慰

聖天子已飢已溺之願哉是固樂得誌之以爲凡神風且俾司牧者防江時入寺禮聖餘覽之知所勸云

附觀風示

陸炯

貢玉掄珠必在琳瑯之府規天萬地首求輪囷之材

公安縣志

卷之七

藝文

四十七

蓋拜獻必有先資惟文章足以華國公邑地多勝蹟代有傳人工部堂存浣花分韻靈均祠古餐鞠揚芬諡典則兩美鑣聯科名則一門鼎峙至於蒲綴連珠穀登雙穗凡此地靈人傑允推俗美風醇若夫士習之端攸關風氣人文之萃首賴觀光况典索邱墳本多博物梗楠杞梓夙裕良材

欣逢

聖天子加意藝林頻開蕊榜詔舉臨雍之典聿宏同軌之風學海性山震今轍古本縣三魚承業五鳳濫聲芹

藻葳蕤秋高鳴鹿蓬萊竊窾春靄翔鸞茲雖一行作
吏尙祈三物興民多士蒞史枕經夙刷搏風之翮薰
香摘豔宜抽晝日之毫欲愜鄙情須觀佳作茲擇於
本月二十二日躬詣書院面試多才行見筆燦生花
不愧冰甌之滌聲聽食葉何須銅鉢之催窺豹見一
斑固所願也吐鳳翔千仞請嘗試之

救荒竒策

袁宗道

日者天災頻仍萬口嗷嗷東南苦於天吳西北困於
旱魃山陝之間食石以延須臾之命何論懸罄哉天

公安縣志

卷之七

藝文 策

四十八

予盱食公卿拊髀計可甦元元者不難胼手濡足圖
之而二三臺諫皂囊屢上卽不能外蠲賑二議者以
愚讀周禮荒政可裨今緩急莫如散利莫如薄徵散
利卽今之賑薄徵卽今之蠲蠲賑二議卽令管晏持
籌賈晁精算計必出此矣然而竟未能濟元元之急
者何也持其迹而拘攣弗變獵其名而奉行尠實也
拘攣弗變奉行尠實卽絲綸時下日纍載少府之金
而馳之郊何益乎故愚竊計蠲之策一善行其蠲之
策三賑之策一善行其賑之策六今海內重菑郡邑

之稅應存畱者業已免徵而起運者尙未全豁也枵
腹子遺救死不暇而朝夕辦此故起運之課宜省也
流聞州邑不肖之吏黃封雖下白紙猶催饑羸之夫
腹無半菽而手足猶繫於桁楊藉當代之曠恩爲潤
篋之便計乃其姓名猶有不入撫巡之白簡者何其
貪而黠也故苛徵之察宜密也民方草食不充而大
吏猶華軒盛騶烜赫載道軒輶之使至餽遺充斥供
張豐腆此非民膏何以給之故官守之自奉宜薄也
茲善行其蠲之三策矣以幽遐蔀屋悉仰內帑其勢

公安縣志

卷之七

藝文 策

四十九

易窮而悉舉州邑之庫藏贖緩給州邑之窶者鮮不
濟矣故從朝廷賑之則難從州邑賑之則易也一邑
之中一都之內豈無豪貨財好施與者故令上賑之
則難令下民自相賑則易也里之厚貲者所捐若而
百則賜棹楔旌之若而千則爵之若而萬則厚爵之
富民有不竭蹶以趨者乎故強之使賑則難勸之使
賑則易也幽遠山民去城百里晨起裹糧蹙蹙趨城
猾胥猶持其短長非少賂之弗得徑受賑得不償失
奈何宜令耆民之廉平者偕里之富好施者臨其聚

落招給焉平有賞私有罰蔑不蕲矣故趨民就食則難移食救民則易也或量里之廣狹爲爨若干令者民及富民之平者烹糜而日飼之期於便近民無薪水之煩得飽食矣故散粟給民尙難爲糜以飼民尤易也夫珠不可襦玉不可食有米粟乏絕之處人至抱璧以殞者故卽得州邑及貧戶之賑而操金貿易轉移尙艱故使下民貨粟則難官司爲轉貨而給之尤易也凡此皆善行其賑之策矣語云中流失船一壺千金小補罅隙之計大都若此豈能奇乎善哉先

公安縣志

卷之七

藝文 策

五十

儒言之也有治法無治人今法非不犁然具而州邑之吏故紙尺一以壅澱澤可濟乎故在天子清心節用凡內府供應一切倣諸祖制毫無所增上絕冗費則公府有餘金而賑易私家不必濫取而蠲又易撫巡諸臣又窺見意指誰敢不堅羔羊之節以玷官箴一二奉行不謹之吏且解組去不爲蝨矣不然吾未知果有奇策之可以救民也

南平獻瑞麥頌

并序

監利舉人 潘學植

牧銓先生治公之四年夏五月長里唐姓民鄧姓家

田產瑞麥數本或二歧三歧五歧交里胥獻之備述公德政所致公謙退不以自居勞賞農人謂係耕作之勤豐亨之兆焉邑人士感公德政越數百里丐叙於植植聞而喜弗敢辭謹按邑長里枕河之東隄亘三十餘里趙楊孫諸垵資爲保障壬辰隄齧於水公勞心撫字隄之廢者次第畢修而瑞麥卽由是而出植嘗讀史如張堪守漁陽開稻田八百餘頃民歌其桑無附枝麥穗兩歧而瑞麥一見宋皇祐三年眉州彭山縣獻瑞麥圖五歧者一本三歧者二本二歧者

公安縣志

卷之七

藝文 頌

五十一

十餘本上詔以束帛賜農夫而瑞麥一見明洪武三年陝西寶雞縣麥秀三歧五歧劉青田作頌歸美上德而瑞麥又一見夫由漢及今幾二千年矣由漢而上夏同本異穎殷異本同秀周三穎同秀亦不詳其爲禾爲麥遥遥數千載獨於公之治民而麥之二歧三歧五歧者始又一見豈非不可倖致與植壬辰主講南平書院側見公請卹請賑不畏 廷議有古苗蓋風念重隄防不避風雨有古王尊風議蠲議緩不忍催科有古元結風今果政成而瑞叶時和而祥應

善乎宋祖有言曰朕以豐年爲瑞五穀爲寶若茲多歧之麥則又瑞之大寶之尤者也

國家久道化成河清星聚史不絕書和氣致祥固不待言然非有愛民如子務本重農之良有司則麟遊而山陽至再鳳集而潁川尤多豈不以祕景休徵固聖天子遊河觀洛之希瑞而一方一隅尤足以徵善政而驗化理者乎植以振鐸於黃不獲買舟南旋躬覩多歧異狀然以數千年寥寥僅見之瑞得預紀載之榮斯亦禱昧所不暇揣者矣謹拜手而獻頌曰

公安縣志

卷之七

藝文 頌

五十一

重輪抱戴徒事鋪張醴泉浪井附會荒唐朱英紫脫獬廌當康飛走動植瑞益渺茫於惟賢宰琴鳴於堂澄心撫字敦勸農桑一行一效鐵低炭昂爰有嘉麥在邑之陽三歧五歧競秀連芳天人交感兆應循良凡厥庶民口碑載揚公乃謙退辭弗肯當不自爲賢其賢愈彰政成將去猶慎宣防挽鄧情左借寇思長雖然此固公邑士民之私見植則願公之入

綸扉而贊化理俾太史得以徧天下而書瑞書祥

請給寇公祠祀典疏 明嘉靖七年

戶部尙書 臣 鄒文盛謹奏 臣 原籍湖廣公安縣境內有宋臣忠愍萊國公寇準祠堂一區史誌所載故老所傳蓋謂準自雷州喪還道出公安邑民插竹迎祭後復生筍成林卽立廟祭祀以羽流主祭事號竹林道院宋南渡後孟珙制置荆襄於道院東南築書院以處四方流寓之士祀準於內因名竹林書院理宗親灑宸翰書額賜之本朝改書院爲儒學而道院仍舊數百年來邑人歲時致祭率以爲常 臣 按宋史本

公安縣志

卷之七

藝文 疏

五十二

傳準事太宗眞宗朝爲相忘身殉國如壽王之立澶淵之議是其功之大者餘不能悉數也及遭讒而死感民弔祭能使旣斬之竹含生出筍蓋其忠誠義氣有以動天地孚草木非偶然之故也今祠宇雖存而儀文不備伏望陛下追念忠賢祭需等項定制實天下爲臣子每歲春秋縣官舉行祀事永爲定制實天下爲臣子者之大勸也 部覆如議行之

祠自楊公之駢改遷北關外復又遷於城內道光己酉祠圯復遷南平書院之西

舊縣遷城疏

明崇禎七年
二月初七日

欽差提督西司房官旗辦事錦衣衛管衛事都督同知^臣鄒之有謹奏爲流賊勢逼荆襄土城濱水非地懇乞聖明俯允輿情擇基遷建以安保障以垂永久事竊照流賊豕突鄖襄則荊州有剝膚之勢^臣籍公安正當要害雖蕞爾小邑實荊州之襟帶江漢之門戶洞庭之咽喉七省之孔道也寇至惟憑城守以無恐若^臣邑則有不可恃者矣^臣忝禁衛痛切時艱桑梓利害不容不及時爲我皇上陳之而有所請也^臣

公安縣志

卷之七

藝文疏

五十四

邑地勢下流滄桑靡定二百年來自柴林街遷至二聖洲復自二聖洲遷至油江口至崇禎元年又以江圯請遷蒙皇上鑒允下^臣鄉撫按估費欲動錢糧一萬八千兩卜遷地名椒園計土址初成四門學宮建立並現存磚料等項僅費七千金其餘將次第經營矣不期江水奔潰異常亡何遷基復近大江之澤家鄰蛟室民切魚心人情俱趨趨而不前城工亦蹉跎以漸緩迄今七年仍成曠壤空立泥垣此何城也而可爲要地保障耶茲皇威震赫羣賊旦夕就殄或可

無慮但創建之初正欲爲久安長治之計避江而遷則近江之地終不可卜迄今雉堞未底厥成錢糧尙餘多半不宜另擇安土以立不拔之基乎臣邑中父老子弟僉擇本縣西南四十里曰祝家岡前有峯巒後依岡阜左右岫壑環繞層叢凝結世世保無水患蓋與其近而就窪不若遠以依高且地與新遷舟楫相通可以運載移此造彼朝發夕至遷果得地一勞永逸矣况暫成之而復淪於江朝廷金錢豈不可惜若遷祝家岡不惟永免波濤之害卽未動之一萬一

公安縣志

卷之七

藝文 疏

五十五

千用於實地並已費之七千亦歸實際矣臣思錢糧仍本舊估基址可爲長業且時正切保障而事又下屬人心上關國計用是疏陳上請伏乞我皇上俯憐一方魚鱉之可悲洞鑒百里河江之所繫敕令臣鄉撫按道府縣諸臣速給未發錢糧早遷催竣庶金湯永固帶礪長存萬民享樂利以無驚千載共乾坤而並久臣與合邑民同戴皇恩於不朽臣不勝激切待命之至

再疏

崇禎九年

欽差提督東司房官旗辦事太子太保錦衣衛掌衛

事後軍都督左都督臣鄒之有謹疏爲遷城奉旨已久流氛橫突宜防伏乞聖明嚴敕速竣城工以固保障事臣邑公安濱江水嚙城圯又罹火災臣於崇禎七年二月內具有流賊勢逼荆襄等事一疏奉聖旨遷城避水依高有裨保障但事關合邑動費萬全着彼處撫按官會議具奏該部知道欽此欽遵迄今三年矣時流賊遍滿臣鄉官民憑何守禦誠有足爲寒心者蓋因改遷以來縣官凡經五易掌篆有如傳舍是以朝方受事夕忽輟工倘非久任責成難就金湯

公安縣志

卷之七

藝文 疏

五十六

鞏固茲賴撫臣余應桂爲按臣時加意地方苦心設處捐貲助費錢糧陸續接濟今有新按臣徐之垣激揚振作刻期可竣兼之府道竭力贊襄縣官張大韶精敏練達諸務綜覈並督工驛丞袁之彥等分任催趲羣力畢舉工程正有頭緒但恐轉盼瓜期銓陞忽至經手之人倏而卸事將垂成之績爲半途之墮矣公安一邑不足惜其如皇上封疆何伏敕吏部暫停陞轉俟其工完優敘示酬庶責任專而城工可計日俟矣臣不勝激切待命之至

六瑞說

李應鷺

語有之和氣致祥和之義大矣哉今夫動植之物何地蔑有乃公安一隅居者相與嗟嘆於野行者相與傳說於路遠近奔走驗視狀其物之異而爲瑞者凡六以歸之

邑侯楊公公卻其詞謙讓不居且禁以必毋上達竟不能止嗟乎物之異非物爲之也造物者爲之也而民之效此媚茲非民爲之也宜民者爲之也民之言曰楊公之守茲土也汔五年所士安於讀農安於耕

公安縣志

卷之七

藝文 說

五十七

工商安於市廛旣寬惠以柔民復明慎而折獄事事出於至誠是以惟德動天所謂政通而人和非耶人和而天休至自然之理也

穀穗兩歧

葑田穠穫

龍升城內

牛犢雙產

蒲綴連珠

枯木復生

跋

龔三捷

志者史之一體自漢儒撰地理風俗諸篇郡邑始皆有志要皆昉小史外史之義以裨益吏治考鏡得失

賈誼曰移風易俗使蒸庶回心而嚮道類非俗吏所能爲在昔朱文公守鄱陽首問郡志識者謂其知大體我 邑侯楊公之所爲豈復異是捷以稀年衰老召應鈔寫之役竊窺 公之苦心其所以扶植世道黼黻泰平儒術卓有本源而附驥之蠅遂得因之以千里抑何幸歟聊識數言於簡末

公安縣志

卷之七

藝文

跋

五十八

公安縣志卷八

藝文下
雜記

公安縣志卷之七

藝文志下

書目

宋

張景 洪範解一卷 集十卷

明

王恂 誠齋集

王軾 平蠻錄二卷 明史本傳稱軾於宏治十

三年督貴州軍務討普安賊婦米魯用兵五月破

公安縣志

卷之七

藝文_下書目

一

賊砦千餘盡平其地是編所錄卽其奏捷之疏也

王輅 師卦解一卷 輅以鳳翔府通判歸隱平

樂村竹林蔡復一撫黔過而問學輅著師卦解一

卷報之皆折衷至理

鄒文盛 瑣闡奏議 默菴奏議

袁士瑜 海蠡編二卷 此書大旨以儒釋二家同

源異派或援釋疏孔或證孔於釋謂濂洛諸儒於

聖人之書詮釋妙暢如樽海是編如蠡注海故名

海蠡編

龔世薦 方湖講學集

袁宗道 尚書纂註四卷 白蘇齋類稿二十四卷

袁宏道 瓶花齋雜錄一卷 此書多記聞雜事及

經驗良方閒及書傳 觴政一卷 是書記觴政

凡十六則前有宏道引語採古科之簡正者附以

新條爲醉鄉甲令朱國楨湧幢小品曰袁中郎不

善飲而好談飲著觴政一篇卽此書也

宗鏡錄十二卷 明文雋八卷 錦帆集

敝篋集 廣陵集 破硯齋集 華嵩遊草

公安縣志

卷之七

藝文_下書目

一一

瀟碧堂集 中郎集四十卷 公安縣志

袁中道 珂雪齋集二十四卷 禪宗正統一卷

遊居柿錄二十卷

袁彭年 省垣奏議 掌憲奏議 土風遺稿

詩細 史屑

袁祈年 梅花奧集 南遊草 三冬草 篤蓐草

續桃花源遊草

尚 校 尚氏家繩集

尚文光 擬陶詩 懷谷詩文集 北觀稿

燕翼錄

高重望 致遠齋集 遠青閣集

毛羽健 西臺奏議十卷 和兒詩十卷

委羽集一卷

劉珠 疑庵集

成己 七洲集

王格 少泉集三十三卷

田昌 吳越草 爵茲館 綠映軒 微尚亭

王承先 豔雪齋

公安縣志

卷之七

藝文下 書目

三

龔仲慶 遜庵集

馬芝 紫崖詩集

房陵 公安縣志 正統時修

梁善 公安縣志 成化時取
房志增修

國朝

孫錫蕃 公安縣志 舉人高拙庵袁夢溪諸生何

粹中同事纂修

何國棟 公安縣志三卷

楊之駢 公安縣志六卷

馬龍騾 時藝稟

陳文燦 實齋詩文畧

毛壽登 廓園集四卷

龔家仁 雙田詩文集四卷

陳信中 新遠集

沈光斗 性理五聲 躍亭文集

洪 鐘 嘯谷集

嚴文謨 宦閩紀事

羅宏漳 崇本堂文稿

公安縣志

卷之七

藝文 下 書目

四

田鍾雨 海浦遺愛編

袁廷翹 竹嶼堂集

羅才樑 平苗紀畧

田國文 荊陽七藝 廿二史提要 少陵詩選

鄒美中 燕石藏稟 西林雜著 左傳約編

左傳分紀 古詩選 語策編年 唐詩中聲集

試律約箋 華亭韻通 切韻表 音韻支析

田家崧 人鑑

袁憲健 小箕簞谷詩集

侯家璋 守默齋詩集

侯家光 偃蓋山房賦草

李廷璧 跨鶴樓詩集

公安縣志

卷之七

藝文 下 書目

五

詩 古今雜體

公安懷古

唐 杜甫

野曠呂蒙營江深劉備城
寒天催日短風浪與雲平
灑落君臣契飛騰戰伐名
維舟倚前浦長嘯一含情

官亭夕坐戲簡顏十少府

少府公安尉公

南國調寒杵西江浸日車
客愁連蟋蟀亭古帶蒹葭
不返青絲鞵虛燒夜燭花
老翁須地主細細酌流霞
公安送李二十九弟晉肅入蜀
余下鄂沔

正解柴桑纜仍看蜀道行
檣烏相背發塞雁一行鳴

公安縣志

卷之七

藝文下 詩

六

南紀連銅柱西江接錦城
憑將百錢卜漂泊問君平

移居公安敬贈衛大郎

衛侯不易得余病汝知之
雅量涵高遠清襟照等夷
生平感意氣少小愛文詞
江海由來合風雲若有期
形容勞宇宙質樸謝軒墀
自古幽人泣流連壯士悲
水烟通徑草秋露接園葵
入邑豺狼鬪傷弓鳥雀飢
白頭共宴語烏几侍棲遲
交態遭輕薄今朝豁所思

公安送韋二少府匡贊

一作建贊

逍遙公後世多賢送爾維舟
惜別筵念我能書數字

至將詩不必萬人傳時危兵甲黃塵裏日短江湖白
髮前古往今來皆涕淚斷腸分手各風烟

畱別公安大易沙門

隱居欲就廬山遠麗藻初逢休上人數問舟航畱制
作長開篋笥擬心神沙村白雪仍含凍江縣紅梅欲
放春先踏鱸峯置蘭若徐飛錫杖出風塵

曉發公安

北城擊柝復欲罷東方明星亦不遲鄰鷄野吠如昨
日物色生態能幾時舟楫渺然自此去江湖遠適無

公安縣志

卷之七

藝文下 詩

七

前期出門轉盼已陳跡藥餌扶吾隨所之

醉歌行贈公安顏十少府請顧八題壁

神仙中人不見得顏氏之子才孤標天馬長鳴待駕
馭秋鷹整翮當雲霄君不見東吳顧文學君不見西
漢杠陵老詩家筆勢君不嫌詞翰升堂爲君掃是日
風霜動七澤烏蠻落照銜赤壁酒酣耳熱忘白頭感
君意氣無所惜一爲歌行歌主客

公安安遠寺水亭見展公題壁愴然流淚因書

四韻

安遠寺即
二聖寺

元正

碧澗去年會與師
兩三人今來見題壁
師已是前身
芰葉迎僧夏
楊花度俗春
空將數行淚
灑遍塔中塵
畱別公安賈明府
戎昱
葉落門前江水深
淺於羈客報恩心
把君詩卷西歸去
一度相思一度吟

贈宗人前公安縣令君

鄭谷

喧卑從宦出喧卑
別畫能琴又解棋
海上春耕因亂廢
年來冬薦得官遲
風中夜犬驚槐巷
月下寒驢嚙槿籬
孤散憾無推唱路
耿懷吟得贈君詩

公安縣志

卷之七

藝文下詩

八

公安

宋陸游

地曠江天接沙隴
市井移避風畱半日買米待多時
蜨冷停菰葉鶴馴傍艣枝
昔人勲業地搔首嘆吾衰
泊公安縣

秦關蜀道何遼哉
公安渡頭今始回
無窮江水與天接
不斷海風吹月來
船牕簾捲螢火鬧
沙渚露下蘋花開
少年許國忽衰老
心折船樓聞笛哀

孫黃渡

范成大

捨舟從陸更閒關
徑仄仍荒亦未乾
棘刺近人牢閉

眼泥塗兀馬繫扶鞍茶山盜藪路程惡麥隴人家懷
抱寬擔僕輿夫盡劬瘁病翁那得更加餐

發襄陽後却寄公安故人 包 佶

揮淚送故人將書報所親晚年多疾病中路有風塵
王粲頻徵楚君恩許入秦還同星火去馬上別江春

竹林祠 王十朋

油水江頭寇相祠凜然如坐廟堂時一點精忠不負
國枯竹知公人不知

過公安 趙 抃

公安縣志

卷之七

藝文下 詩

九

劉郎浦上公安渡我過高吟老杜詩烟浪幾重江幾
曲算應風物似當時

公安縣 陶商翁

門沿大堤入路傍淺沙行樹短天根起山窮地勢傾
孤舟難泊岸遠水欲沉城夜半尋津濟烟中菰火明

蕭寺黃冠夜泣 明 建文帝

王子春正十三日寺遇黃冠不相識結蒲拄杖坐西
偏低頭不語意自閒亡何一人復冠籜髮黃面縐多
愁顏撫掌遽驚還嘆息漏分但聞聲唧唧似裏萬斛

愁難傾哀猿夜噉寒鴉泣余腸縈結詎堪言布衾溼
透皆淚痕晨興往探訊其苦兩公踪跡雲無根空餘
蟬斷字數箇依稀恍是亡臣名我欲把毫悉胸臆冰
凍筆花寫不得

出程濟從
亡隨筆記

送荆南帥戶侯移鎮公安

浦源

悠悠旌旆碧雲端遠去孤城入亂山淮月上樓人奏
角海天低樹雁臨關幾家白髮遺民在千里青絲獵
騎還舊日荆南多勝概別來惟見畫圖閒

寇公祠餞江編修還蜀

王恂

公安縣志

卷之七

藝文下 詩

十

仙舟西去溯流遲江上登臨弔古時錦纜纒牽巴子
國椒園先拜寇公祠綠楊烟鎖連芳徑修竹雲高長
茂枝千載忠腸遺憾在天涯此日動君思

前題

王軾

大事當頭只自知誰能協力濟艱危君王不肯爲孤
注宗社將應到色絲也有通天犀作帶更無插地竹
生枝尋幽坐徹風篁裏山鳥山花總寄思

前題

鄒文盛

名在當時虜亦知北門鎖鑰寄安危摧鋒聊試千鈞

弩補袞應須五色絲
奸骨已消炎海瘴
忠魂猶託渭川枝
崖州咫尺還相遇
天道分明可再思

前題

成 已

江上遺來寇相祠
旋將舊竹插新枝
北門鎖鑰偏遺憾
南國蘋蘩重所思
自昔樓臺無地起
於今梁棟有人支
春回精爽荒烟裏
爲借鄒陽玉律吹

懷友人

懷君不見苦低垂
漫倚瑤琴寄所思
天遠幾時靈劍合
月明無那洞簫吹
孤村碧樹劉郎浦
淡日蒼雲寇

公安縣志

卷之七

藝文 詩

十一

老祠追憶同袍舊
游地鷄鳴僧榻夢
回時

江中凱旋爲伍松月賦

鄒文盛

中丞執法統江防
文武才兼孰短長
石浦昔曾占宅相
松滋今已破天荒

石浦公外祖所居松滋甲科自公始

勤王事業真

轟烈報主忠誠正
激昂考最不須離
信地殊勲多日紀
旂常

送熊太守致仕還澧陽

咫尺孱陵接澧城
無因杯酒餞君行
洞庭船下風仍健
霄漢雲遮月自明
宦績真堪青史載
閒情直與白

鷗盟回看九子池頭水會有靈雛向日鳴

鄒大司徒致政歸里

何珊

輔國功成便乞身錫歸尤荷聖皇仁崇階要秩鄰三
少全節完名更幾人宦海其如專盛美周行誰不望
清塵居閒且作者英會載酒尋幽莫厭頻

前題

祭上海酒陸深

長江西來灣更灣瀟湘洞庭波潺湲大司徒公孕其
秀兩疏萬石伯仲閒余昔抱疴卧空谷聞公慕公不
可攀接公巖廊擁紳珮所憾向晚隨清班一朝抗疏

公安縣志

卷之七

藝文 詩

十一

辭天子但道老臣宜投閒古人肝膽貴真意向來出
處乃大閑卽從當代數名碩前有東山後黃山我公
福履尤過之今日方成畫錦還綠野自應娛宰相南
陽況是帝鄉關長江蒼蒼水雲密端可起懦兼廉頑
此風此道詎可少吾儕小人空厚顏吾儕小人空

厚顏

前題

分宜侍郎嚴嵩

力捲風塵屢乞身都門冠蓋送歸人病來國計關心
在老去鄉山入夢頻沙上鷺鷗堪避俗山中薇蕨正
逢春亦知感激君恩重夜夜滄洲望北辰

前題

餘姚孫堪
指揮

心安皆雅適道在有餘光歸試黃山屐春深萬木長

畫錦堂

劉珠

丹青運盡精神巧山水移來畫錦堂透石笋根穿地
窟探花蛺蝶惹天香蛙鳴宿雨催春老魚躍東風引
浪長自是化工眞發育昆蟲無處不悠揚

外大父方伯公

袁宗道

風神只似壯齡時鶴髮丹顏古接羅此日南平白社
長當年中土紫薇司燈前歷歷蠅頭字篋內翩翩近

公安縣志

卷之七

藝文下
詩

十三

體詩江月江花時共賞非仙非隱使人疑

孝廉舅惟學

少年經術兼詞學中歲空門又道家服藥前身應許
遜博聞夙世定張華懷中明月珠堪售望裏神仙路
不賒只恐鳳池須綵筆難得勾漏問丹砂

侍御舅惟長

懶慢人間惟叔夜閒居膝下似安仁雲霄調外沉冥
客花月尊前感慨身圃學東陵瓜欲結家通北渚蕙
堪紉長卿此日游將倦醉月吟風幸託鄰

中郎弟進士

前年羽獵獻長楊歸去三湘問鴈行作賦麗如袁彥
伯通經精似蔡中郎角巾領袖高陽侶麈尾憑陵俠
少場夢草眞堪對小謝種花無那去河陽

小修弟文學

卻憐射虎人難偶祇覺雕蟲技益工白日悲歌燕市
筑青春失意楚人弓隴西不媿稱金友僕射從今避
火攻如此無官窮亦得高名誰復杜欽同

以上五人與石浦先生舊爲南平社六人

公安縣志

卷之七

藝文下 詩

十四

行部公安袁進士中郎過訪參政陸懋龍

雙旌初到部片刺忽臨門冷榻塵誰掃新茶火正溫
望君收白眼屏從接清言待浙官廚米畱燈坐日昏
送王以明先生赴南都試 袁宏道

把酒初聽百舌鳴蒼烟盡處看君行梨花雨漲春流
疾柳絮風飄畫槳輕寶劍危冠眞國士高牙大纛盡
門生秋來怒翻天池老不怕垂天化不成

別龔散木

梅雨濯江干江風細吐寒紅亭一杯酒慘無主賓歡

天風吹子墮倏忽送子還遊蹟如電影閃爍太無端
子曰爲官苦予嗟行路難各自相慰勞言言沁心肝
與子如林鳥升沉各羽翰別子如湍水東西異波瀾
何如一合併白首臭春蘭萍散有時聚雲老終還山
江頭風日雨容易凋朱顏

過藕花莊

深院竹編牆叢梢若箇長入門溪雨濺滿路麥風香
好夢因涼得閒愁到水忘因循二十載未到藕花莊
柳浪館同龔散木小修賦得雪中新柳

公安縣志

卷之七

藝文下 詩

十五

纈青縈白幾千條胡粉聊將贈舞腰當日輞川無此
景強于雪裏寫芭蕉

書館

鄒得魯

孤館蕭蕭燒短檠蛩聲斷處蟋聲聞侍兒不解忘眠
趣報道譙樓已四更

讀錦帆集寄卓老

袁中道

世事玲瓏說不周慧心人遠碧湘流都將舌上青蓮
子摘與公安袁六休

六休袁宗道子

贈龔散木舅謝諸生歸隱

黃雞唱罷慘無歡萬事勞人轉覺難君自愛看高士
傳予今欲溺腐儒冠朝耕西嶺雲千畝夜釣南湖月
一灘身似閒鷗心似水纔離火宅便輕安

元宵

同雲急雨暗亭臺幾有瑤華照酒杯佳節風光雖不
似歡場懷抱也宜開時移入眼無塵物老嬾隨君作
散材歲歲願如燈上影兒童拍手說重來

草堂

龔仲元

聊且戢烏羽如何捋虎鬚謔能妨性命醉不計頭顱

公安縣志

卷之七

藝文下 詩

十六

閱歷成今古幽尋盡有無油江千尺水夜夜明月孤

送初月弟還公安

袁彭年

久與流離習鄉情漸漸灰一聲吾弟去萬感片時來
友戚今俱盡音書何處裁若逢兒在沔但說我將回

哭侯公異度殉節衡湘

王調甫

漢臣殉節亦頻書義烈惟君倍凜如膝骨搗殘尤奮
迅舌鋒泉湧舊迂疎屢銓多士歸冰鑑誰贖孤兒載
輶車痛哭荒村風雨夜常瞻精爽夢魂餘

館中寄友人

貢生 羅遇奇

坐成枯寂勝蒲團月滿風清苜蓿盤飽足黃山一片
色攜歸分寄共君餐

國朝詩

酬贈田二伯珩見和移居石坪 毛壽登

親老思偕隱兵凶倚降祥每嗟魚饌薄但覺馬通香
草樹林邊認笙歌火裏忙餘生惟爾我且喜各能康

寇退寄毛恭則

華容貢生 嚴首升

兩年憐墨突今日尙吾廬雨歇林無雀春歸食有魚
漸收旣去僕喜看不全書念子猶行野言旋幸莫徐

公安縣志

卷之七

藝文下 詩

十七

送周來公之任

馬 芝

文氣日凋敝吾子特善鳴因茲濂洛後暗室一炬明
懷道不自私君子尙其貞勉莫爲仕貧冰雪甯錚錚

天王堤

諸生 毛仁軌

暗裏天王效指揮周堤蜿蜒象輪圍世塵迴隔應難
到惟放鐘聲出翠微

明月池

堂前忽現琉璃地流潤還滋功德林最憶昔賢詩句
好清池皓月照禪心

築堤吟

知縣 何國棟

岷山萬派赴荆門三月桃花怒漲翻但使安流還禹
貢敢言真勇是王尊千家鼙鼓連波沸百里虹霓載
浪屯汗雨鍤雲民力普污邪禾黍勝高原

丈勘二聖洲蘆政

知縣 沈爾燦

弭擢容城秋水清荒洲履勘又催程無邊野色連雲
暮不斷征帆隔浦明少府金錢仍歲入漢京湯沐問
遺民寒潮夜落蒹葭冷故國蒼涼幾變更

泛舟柳浪湖

訓導 孫錫蕃

公安縣志

卷之七

藝文下 詩

十八

柳浪千年綠中郎故里墟雙星懸夕永孤月掛林疎
棹泛銀河遠風高脫葉徐瓶花何處是隔岸冷紅蕖
行宮應制賦得佳氣滿山川 陳文燦

康熙癸未 聖祖仁皇帝巡幸
豫州命試有司 欽定第一

洛道東巡 玉輦來出關紫氣望中開恩高嵩嶽雙
峯靄澤滿黃河巨浪催是處網緼縈綵仗無邊景色
接僊臺休徵自應昇平象遙聽懽呼徧草萊中州藝
文志
賀荆南新任副憲孔東玉隨車雨後即晴七月

二十日

乘驄巡楚喜遙臨膏澤隨霑潤已深禾實四郊秋有
粒風清三郡境聞琴家傳時雨作霖雨身慰民心動
帝心旬日遠同朞月意相看何處不謳吟

武侯祠落成

知縣 楊之駢

幼讀三國志師相倍生欽喜讀出師表愛誦梁父吟
江南無專祀惆悵罔登臨出宰南平日入境首相尋
人指三橋裏野曠樹蕭森昔建武侯祠祠荒榛棘深
尙存雙石柱居民不敢侵未幾來事事黃鸝空好音
停輿覽舊址忠魂曷忍沈垣楹難猝就三載捐俸金

公安縣志

卷之七

藝文下 詩

十九

鳩工賴文子

邑庠文
貽煥

廟貌煥幽岑雖乏參天柏翠柳

自成陰行人肅瞻拜勝蹟畱古今舉墜爲予職悠哉
愜素心

舊縣感懷

荻葦蕭蕭一望迷當年曾此建城池殘碑猶識三袁
里斷岸空存二聖祠柳浪名亭波浩浩孱陵舊道草
離離堤邊憑弔堪惆悵最是風清月照時

閱堤至民安驛遇雨口占

勞心修築堵狂瀾宵晝無分次第看細雨沾衣防淺

滑微風撲面耐輕寒旁觀只道居官好局內方知作
宰難但得崇墉開百室此行差不愧民安

楊公堤

全楚皆澤國南平素苦水大堤臨江渚綿亘百餘里
下車正值興工時策馬閱視任奔馳在在雖可堵狂
瀾堅厚無過楊公堤楊公邑乘載其詳學問經濟誰
能比當昔舊邑繁華日便識滄桑更變理遙憶數十
餘年後城郭盡付波心裏預築此堤廿里餘廬舍田
園無傾圮至今俎豆崇祀典千秋萬世樂歌只吁嗟

公安縣志

卷之七

藝文下詩

二十一

噫嘻四世三公吾家舊如君無愧關西後前有召父
後杜母未識余能繼公否

縣歸晚舟

鄒養赤

山慵城市怯日落獨歸船遠火如浮水懸星不在天
依稀記草樹浩蕩傍葑田岸泊防飢虎呼童笑語還

油江懷古

諸生 田藍玉

丞相濟吳師艱難此地支一枝鳩借蹙半壁虎爭危
周陸遺踪杳孫劉霸業隳但憑天塹在控扼重當時

橄公桅

用恒將軍韻

諸生 杜顯傑

郡城之東橄公桅鬼護神守倚雲隈一代精忠原不
死淒風苦雨長蒼苔歲在丁丑菊花秋將軍閒眺望
楚樓憐才提唱發浩歌表忠健筆貫斗牛過客一覽
紀之詳立亭泐石爛成章滿漢瑤篇連雲錦孤桅屹
立彌精光當年闖賊寇荆關司訓將才腰箭環挺身
力距戰且守氣節巋然成斗山可憐力盡遭毒射身
縛長竿三晝夜穿胸斷臂雲路坊長軀修髯桅上化
熱血飲桅桅不摧紀南弔古何勝悲雲鶴歸來棲難
穩想君掀髯更張眉英風懍懍城上竿竿頭有淚落

公安縣志

卷之七

藝文下詩

二十一

吟壇滔滔東下長江水嗚咽萬古走波瀾公之巔末
錄郢志名教綱常匪細事我欲爲君賦招魂腸枯髮
禿難爲序君不見城頭隍池水光白桅影臨潭揖過
客舟前說與雙飛燕莫將輕橈打靈魄

白燕

毛業溥

色比梨花花減神素心一片傲風塵高飛黃閣金鑲
玉低舞青池雪打蘋皓鶴行中呼小友烏衣國裏號
山人如今正好凌雲去不作尋常入幕賓

渡荆江至孱陵驛

南編 滙修 吳省欽

劉備營何在川原極望疎
秋生梧桐下雨近
荳花初折戟埋終古
迴帆切太虛
吹燈有山鬼
卽次委琴書

輓蔡孝廉輝琳

知縣
任郿祐

灼灼春月花離離
秋日草春盡
花翻飛秋深
草枯槁
人生非金石
豈能長壽考
君死亦何悲
悲君死太早
兒女未成行
雙親復衰老家
無顏氏田經史
苦探討
獻策阻金門
一第徒自好
胡天詔斯文
令人生煩惱
我雖吏風塵
愛才如愛寶
去歲事棘闈
爲君文傾倒
契合磁引針
神洽鳧在藻
譬彼灌園人
相期在合抱

公安縣志

卷之七

藝文下 詩

二二二

一朝失所珍無處堪祈禱
簡編不忍開恐見君遺稿

雅愛杜愛竹秀才

大號賦此藉以相勸

知縣
劉廷謨

君能愛竹解堅貞
我愛虛心氣節清
他日操持今日裕
鼎鐘事業本書生

同孫紫溪茂才余次卿侍御長湖晚泊

毛家槐

維舟湖畔暮雲深
近水遙山客正臨
無限風烟迷古渡
幾多意緒觸寒砧
紅圍村落楓林晚
碧點溪橋柳色侵
吟罷奇文方載橐
雕蟲偏惹壯夫心

暮春登東門城樓

易斗光

岌業危樓俯治東登臨搔首夕陽紅征帆峭落關河
水牧笛橫吹驛道風臺宅漫尋車武子祠堂猶說寇
萊公春城多少前朝事都在青苔碧草中

柳浪懷古

侯家光

柳浪湖上柳如烟柳浪湖下浪接天浪花柳絮交春
色沿湖多泊釣魚船可憐湖岸釣魚翁去來打槳浪
花中豈知浩渺烟波裏當年曾此住袁公我聞昔日
油江口三袁兄弟耽詩酒湖邊搆起水心亭陶潛門

公安縣志

卷之七

藝文下 詩

一十二

外多種柳伯修小修擅文詞中郎更是開天手天馬
行空不可羈遊戲騷壇世罕有三百年來景物非人
去亭空水四圍柳不垂絲湖無主碧波千頃鷺鷗飛
白鷺沙鷗紛起落九原才子不可作東風吹浪碧參
差畫棟雕梁成蕭索君不見湖柳不是舊時腰年年
風雨傍野橋惟有三更湖上月曾照先生貯詩瓢

過公安

松滋
觀察 謝元淮

青山如故人遙見心已悅前峰迎我歸後峰送我別
迎者喜低昂送者愁巖巖薄暮望公安孤城遠凹凸

咫尺辨家園翹首歸思結思欲閒道歸躊躇那可說
有家不如無既近轉騷屑是日天氣清微雨戢炎熱
城北啼鷓鴣城南叫鷓鴣感茲禽鳥情助我離懷切
長嘆語舊山曷由回我轍

走馬堤

諸生 嚴壽春

何年帝子卸金鞍零落遺蹤馬上看萬樹梨花春雨
溼千門楊柳晚風寒紅塵有夢從來幻白骨無情只
自酸莫問長堤興廢事錦官陵寢舊凋殘

題袁中郎先生集後

侯家璋

公安縣志

卷之七

藝文下 詩

二十四

巨眼空千古縱橫止一人步兵爲益友坡老是前身
氣烈聞聲壯才奇出語新滔滔江漢水浩渺放游鱗

畱別詩八首

錄四首

知縣 焦家麟

上接三巴下澧陽交馳水陸織梭忙逢迎我本安於
拙調劑君應別有方村舍月明虬易吠庭除花落蠹
宜防劇憐階下胥徒輩撫馭猶需解澀囊
衣冠從古邁羣倫名教維持戒笑嘖不守楷模終敗
類况稱刀筆悞齊民風雲變幻貧兼富雨露滋培義
及仁此別應須各努力懷刑懷德冀書紳

論文漫詡品題真我是芸窗悟後身口耳詞章徒涉
獵性靈杼柚總清新分來鶴俸知心苦探得驪珠卽
掌珍濟濟前程頻拭目皋比已定愛蓮人
黃童白叟莫聲吞不入公門記至言鄰里有情消雀
鼠吏胥無計擾鷄豚能勤畚鍤堤防固著意耕耘稼
穡蕃舊政定輸新政好臨歧何事又攀轅

畱別詩六首

錄四首

知縣

李 棟

頻年星月未神疲肯遣鋒車聽唱驪薄宦渾忘鳧鳥
幻輕裝不用鶴琴隨悟來圓澤三生石

用李源與僧圓澤在荆故

公安縣志

卷之七

藝文下 詩

一二十五

事見甘澤謠 載得中郎一卷詩 袁公安詩出於性情絕無摹擬塗飾之迹余深愛之
惆悵頻行當道卧有何治績繫人思

金堤千里重防川禹跡茫茫數未全 荆江有九穴十

渡調弦兩口餘俱湮沒不可考 書有河渠誰委壑志詳溝洫奈填淵

淒涼水國餘孤艇零落村墟認斷烟唵到東坡窮命

句 竊取東坡罷徐州往南京馬上作舉鞭謝父老只坐使君窮窮人命分惡所向招災凶水來非吾過

去亦非吾意 幾番沉玉訴蒼天

接土猶深翰墨緣一回小別一悽然新陰桃李期時

彥空谷芝蘭望夙賢砥節宜存孝先志 王沂公字孝先 登程

好著祖生鞭臨歧莫忘殷勤意畱取心香証謫仙
指點長堤去住頻條條疎柳繫江濱漫因風雨懷前
令自有循良在替人鄭渾桑麻慚四載汪倫情緒溯
三春何時再泛荆南棹好饁壺漿認部民

斗湖堤工次

四首之一

知縣

徐步雲

曲陽薄宦又南平戴月餐風曉夜行夾岸芳塏添秀
色沿堤茅屋聽書聲瘡痕滿眼思難徧飢溺關心夢
不成庸吏愛民無妙策瓣香先祝一春晴

道光壬辰大兵南下道經公安 鄒美中

公安縣志

卷之七

藝文下 詩

二十六

妖星睽睽射天狼羽微飛來自鬼方萬馬奔騰塵不
斷將軍昨夜發襄陽

城狐社鼠寄餘生敢向潢池盜弄兵釜底游魂終授
首天南時雨逐軍行

大將旌旗逼斗寒前驅戰士後材官一聲鼓角齊回
首箇箇爭從壁上觀

春風指日賀平蠻銅柱何須界漢關從此南人不復
反銘功直上九疑山

寄西林山人

李澤濤

西林山上一片雪
西林山下人踪滅
我爲訪戴乘興
來今宵霏霏談玉屑
歐陽六一稱醉翁
山水之樂樂無窮
得諸心而寓諸酒
豈真蒼顏頹乎中
問君何事先白頭
一生爲替別人愁
豈知多愁卽多病
胡不遣興酣高樓
亦覺春色共流水
世事變幻長如此
請君爲我一駐顏
四顧茫茫誰知己

城外晚眺

諸生 李文清

小立荒城外
蕭蕭夜氣涼
山峯瞞塔影
月色淡燈光
富貴邯鄲夢
姻緣熱惱場
何如一樽酒
小醉任滄桑

公安縣志

卷之七

藝文下 詩

二十七

客舍烹茶憶鄒星溪

火爐新煮茗
小飲當金甌
水涸溪毛現
月高樹影收
敲砧千里夢
擊柝一聲秋
遙憶沙津客
舉杯正未休
禾田岡觀耕者偶成

荆榛滿地少人行
累日窮陰偶放晴
且喜荒城爲賊棄
長畱片土與民耕
水光渺渺揚帆遠
木葉飄飄落地輕
舉目不須悲寂寞
三湘士女盡南征

節孝祠月夜獨坐

水國波平夜氣清
客情無那漏三更
金風故故催殘

夢揉碎芭蕉作雨聲

邑侯周壽農司馬徙治新城并志書刻期告竣

長句紀實三月十五日 易秉璋

仙吏風裁迴出塵雙鳧飛下宰官身趙衰日趁三冬

暖城工始潘岳花開滿縣春擬築崇墉興雉堞好從

原隰認龍鱗一年治績千年仰膏雨隨車迓部民

瑤函纂次幾經年成帙公然費俸錢讀史初添循吏

傳未當官不忝 侍臣賢先侍御公乙河山滿目收

新治蒼赤關心託舊編自是文章崇政事一封手敕

公安縣志

卷之七

藝文下 詩

二十八

落花天

贊

王襄簡贊

明學士 廖道南

筮羽詞林綴班鑾坡有美一人秉性清和典教成均

文行忠信委心文定不失其正公任巡撫所推許

鄒莊簡贊

德厚無疆業廣有常節堅不渝烈永彌光肇擢諫垣

排闥飛章乃忤逆瑾出守畿邦繼司藩臬惠播甘棠

乃戡叛裔勲紀旂常入握臺紀丕振大綱薦典國計

贊亮朝堂懇疏歸老黃山高岡

公安縣志

卷之七

藝文下贊

二十九

題畫松石贈侍御毛芝田年兄 倪元璐

石既峻嶒松亦傲岸有人如此豈非鐵漢

銘

張景銘

宋學士 宋 企

嚼才華兮懿孝至膺仕兮難老蹇皇皇兮晚獲伸發

吾懷兮露珍茫茫兮安究尙立言兮不朽

鄒莊簡銘

明大學士 顧鼎臣

九澤七川地靈瀦殷鍾賢毓秀乘會昌辰忠言直節

爲國盡臣盤錯屢試器利如新樹勲巖廓正笏垂紳

明良都俞一德有鄰惟德濟時惟德潤身功成身退
人稱哲人

侯偉時銘

鄒養赤

生不必其不朽死不必其不壽孰重孰輕孰先孰後
苟不愧其晶白之心而何患乎悠游之口公之死與
日月爭光山河同久

田鍾雨銘

嚴首昇

其質醅兮其氣清文在中兮澤在民近其光者如有
獲而嘗親聞其風者若或起而自欽以克永世兮而

公安縣志

卷之七

藝文下銘

三十

昌而甯

灰如禪師塔銘 并敘

師諱亮字灰如萍鄉王氏子自薙髮受戒後足跡半
天下終老於公安報慈寺其於彼道求之綦切得之
綦深而守之綦固其舉以示人也引而不發直而不
徇易入而難窮生於萬曆壬寅告寂於康熙辛酉從
其教火浴之得舍利數十齒牙念珠大半不壞斯亦
奇矣前後語錄若干卷叢林重之其徒樹可雪幹建
塔藏其蛻餘予爲之銘曰

雙樹談寂五葉燈傳教網乍裂眞輪恒圓後五百年
疇悉解脫盲龍跛象牛尾麟角孰振其靡孰滙其宗
熊熊太白轟轟三峰亦越海門播聲吳楚白雲高褰
流作甘雨有老古錐繼出江西披襟承流一笑全提
佩以法印辭之不得試一展演天歡魔懾報慈之刹
嶼公所創風火劫更金地榛莽爰卓我錫有眾雲翔
開田說義莖草爲坊荆東澧西湘南潭北細白顆顆
瞻此佛國載陟神山浮乳之源掃塔邦象太陽破顏
凡我傳法爲拔迷情迷不自迷明卽無明云何諸方

公安縣志

卷之七

藝文下 銘

三十一

江河日下濫膺謬錫煩師唾罵十方無住心爲道場
秘藏無遮身作金湯津梁匪疲機緣有息代我敷宣
水光山色道影寂烈燄騰騰晉諸不壞再轉法輪
湖畔窅堵眞身永固我作詩銘百靈同護

賦

囊螢讀書賦 并敘

龔三捷

明府廬江楊公具淵雲之才思裕冉季之猷爲撫民
則燭照逃亡造士則斗輝衿履慨夏日之旣去喜秋
風之徐來於是鶴立一足琴弛七弦進諸生而告之
曰貧者士之常焚膏繼晷底事皇皇爾南平舊境車
武子讀書之鄉也警心午夜苦志縹緲感流螢之有
耀故撮之以一囊卒成大器致身廟堂茲儒林之所
樂道抑爲之前而美彰子曷爲我賦之捷曰唯唯

公安縣志

卷之七

藝文 下 賦

三十一

塊洪爐之大造兮化無情爲有情悲何草之不黃兮
置之死地而後生具兩翼而六足兮託形體於螾蠅
羗渺細而騫舉兮散入夜之微明竊夜光之大號兮
曾何有於照乘顧收之以處囊中兮雅有裨於橫經
聞之螢之爲物也載在月令鶉火之次腐草斯競當
其郁郁河上共此春暘遭薙氏之蘊崇致零落於道
傍薰灼兮趙宣之日酷烈浸淫乎魯僖之雨沓滂一
燥一溼負陰負陽初蠕蠕而蠢動漸熠熠而生光豈
老蚌之含水而登陸兮倘燭龍之多子而光芒過目

發鑽燧之燄屬耳無擊石之鏘羽翼粗成翩然而起
水瀨山巔荒陬錦里月下風前競兒喧女道阻結行
子之淒簾疎窺坐人之綺弄輝輝之花蕊奄乍明而
乍滅添個個於井欄似倡予而和女乃有簞瓢書客
志吞萬卷感鑿壁之無鄰鬩墨墨而浩嘆忽爾觸目
憬然而會用不在大妙用以萃詎聚蚊之成響兮而
集螢之不彗爾乃徵敝絺命刀尺線無取乎折襪製
彷彿乎勿密繫裁成之大如斗諒照夜之赤如日居
然括囊以无咎吾何畏乎暗室陳書數篋簡鍊揣摩

公安縣志

卷之七

藝文下
賦

三十三

白魚急而走死三豕安得渡河藏錦繡才於肝膈憂
金石聲以吟哦想其處置或有縱擒顧草木之若在
抱豈昆蟲之傷不禁賴卜夜之輝煌當計日而踐更
時或出入妙有增減亦聚集而稠密亦離羣而疎散
出返月露之場入張風雲之氣滅壯大畧之觀增辨
魯魚之細稠密迸天祿之藜火疎散擘金蓮之流麗
二酉窮三篋敝牙籤刊墨莊既萬卷樓空富文閣閉
慨黔首之未愚徒邱索之終祕斷秦漢而上之捧文
武於未墜彼光遠而自他有耀何惜乎委曲而益人

神智在昔南平之南嗜學武子之鄉乞靈宵燭餘足
晝長畱芳名於車渚發澧蘭之幽香固非止風度矜
宣武之座崇高發冢宰之堂而已也吁嗟乎暮讀書
今朝大廷御長檠兮歌短檠依日月兮上星辰竊獨
念此流螢

公安縣志

卷之七

藝文下賦

三十四